



駢文舉要卷三

高步瀛

庾子山

哀江南賦

并序

周書庾信傳曰信留長安雖位望通顯常有鄉關之思乃作哀江南賦以致其意楚辭招魂曰魂兮歸來哀江南吳兆宜注引張尙瑗曰史記高祖紀項羽令衡山臨江王擊殺義帝江南地在郴州（湖南郴縣）魏志武帝紀赤壁戰不利引軍歸備遂有荊州江南諸郡蜀志諸葛亮傳曹公敗於赤壁先主遂收江南指長沙四郡而言蓋秦漢以來荆郢上游皆稱江南也至建康之稱江南則始見于吳志張昭傳魏使邢貞入門不下車昭謂曰豈以江南寡弱無尺寸之刃故乎又晉書王導傳賀循顧榮江南之望則自三國至六朝江表亦稱江南今賦中前叙臺城之亂則所哀在建康後悲元帝之禍則所哀在江陵而吳會荆郢適俱有江南之名故摘招魂哀江南之語以名其賦獨註建康者非且信本傳稱其常有鄉關之思信本家江陵鄉關之地其有所屬明矣

粵以戊辰之年建亥之月大盜移國金陵瓦解余乃竄身荒谷公私塗炭華陽奔命

有去無歸。中興道銷。窮於甲戌。三日哭於都亭。三年囚於別館。天道周星。物極不反。

傅燮之。但悲身世。無所求生。袁安之。每念王室。自然流涕。

以上彼所以作賦之由。

梁書武帝紀曰。太清二年冬十月己酉。侯景自橫江濟采石。辛亥。景師至京。吳注引王洄曰。太清二年歲在戊辰。十月爲建亥之月。後漢書光武帝紀。贊曰。炎政中微。大盜移國。吳志張紘傳。注引江表傳。紘謂權曰。秣陵。楚武王所置。名爲金陵。昔秦始皇東巡。經此縣。望氣者曰。金陵地形有王者都邑之氣。故掘斷連岡。改名秣陵。漢書徐樂傳。上書曰。安土樂俗。之人衆。故諸侯無境外之助。此之謂瓦解。左桓十三年。莫敖綏于荒谷。杜注曰。荒谷。楚地。荊州記曰。今竹林是也。御覽地部引。水經沔水注曰。湖水東逕荒谷。東有治父城。顧棟高春秋大事表曰。荒谷在今荊州府江陵縣西。又詳見後注。案周書信傳曰。侯景作亂。梁簡文帝命信率宮中文武千餘人營於朱雀航。及景至。信以衆先退。臺城陷。後信奔于江陵。故云竄身荒谷也。書僞仲虺之誥曰。民墜塗炭。李詳曰。闕若璩古文尙書疏證卷六載。胡朏明說云。華陽在今雒南縣。武王歸馬處。子山自江陵奉元帝命。使於周。取道商維。此華陽在華山之南。正其所必經。若作太華山。陽失之甚矣。步瀛案。胡氏禹貢錐指卷九曰。水經注曰。門水又東北歷陽華之山。卽華陽。

山海經所謂陽華之山門水出焉者也（自注曰見第四卷河水步瀛案山海經見中山經）按周禮豫州鎮曰華山（職方氏）杜氏謂其山連延東出故屬豫州夸父正所謂連延東出者乃西嶽支峰古通謂之華山（自注曰夸父山在今閿鄉縣東南二十五里）而陽華在夸父西南今洛南縣東北故以爲華山之陽縣志云西南之饒谷爲商洛徑道清統志曰陝西商州陽華山在維南縣東北又名華陽山。詩序曰烝民尹吉甫美宣王也任賢使能周室中興焉袁彥伯三國名臣贊曰運極道消。梁書元帝紀曰承聖三年十一月于謹入江陵帝被執吳曰是年歲在甲戌。三國蜀志霍峻傳裴注引襄陽記曰羅憲字令則右大將軍閿宇都督巴東爲領軍拜憲爲字副貳魏之伐蜀詔宇西還宇留二千人令憲守永安城尋聞成都敗後主委質問至乃率所統臨于都亭三日。左昭二十三年傳曰叔孫婁如晉晉人執之館諸箕舍子服昭伯於他邑杜注曰別囚之倪璠曰言江陵之陷已奉使長安爲魏所留（依李改）遙臨國亡矣（左宣十一年杜注曰臨哭也）。左襄九年晉侯曰是謂一終一星終也杜注曰歲星十二歲而一周天。史記春申君傳說秦昭王曰物至則反冬夏是也。後漢書傅燮曰燮字南容北地靈州人也爲漢陽太守賊王國韓遂等進圍漢陽城中兵少糧盡燮猶固守子幹年十

三從在官舍諫曰國家昏亂遂令大人不容於朝今天下已叛而兵不足自守鄉里羌胡先佩恩德欲令章郡而歸徐至鄉里率厲義徒見有道而輔之以濟天下言未終熒慨然而歎呼幹小字曰別成汝知吾必死邪蓋聖達節次守節世亂不能養浩然之氣食祿又欲避其難乎吾行何之必死於此幹嗚咽不能復言左右皆泣下遂麾左右進兵臨陳戰歿。文苑英華所作處。後漢書袁安傳曰安字劭公汝南汝陽人也章和元年爲司徒和帝卽位竇太后臨朝安以天子幼弱外戚擅權每朝會進見及與公卿言國家事未嘗不噫嗚流涕

昔桓君山之志事杜元凱之生平並有著書咸能自序潘岳之文彩始述家風陸機之詞賦先陳世德信年始二毛即逢喪亂藐是流離至於暮齒燕歌遠別悲不自勝楚老相逢泣將何及畏南山之雨忽踐秦庭讓東海之濱遂餐周粟下亭飄泊高橋羈旅楚歌非取樂之方魯酒無忘憂之用追爲此賦聊以紀言不無危苦之辭惟以

悲哀爲主

以上言已遭逢喪亂不能無所述作

後漢書桓譚傳曰譚字君山沛國相人也著書言當世行事二十九篇號曰新論。英華事作

士。晉書杜預傳曰預字元凱御覽學部八引杜預自敘曰少而好學在官則觀於吏治在家則滋味典籍。英華生平作平生。世說新語文學篇曰夏侯湛作周詩成示潘安仁安仁曰此非徒溫雅乃別見孝悌之性潘因此遂作家風詩劉孝標注曰岳家風詩載其宗祖之德及自戒也。陸士衡集有祖德述先賦二篇又文選陸士衡文賦曰詠世德之駿烈李善注曰言歌詠世有俊德者之盛業。周書先作多。左僖二十二年曰不禽二毛杜注曰二毛頭白有二色潘安仁秋興賦序曰余春秋三十有二始見二毛。劉孝標廣絕交論曰藐爾諸孤朝不謀夕流離大海之南吳引閻若璩曰信傷心賦序二男一女並得勝衣金陵喪亂相守亡歿故貌是流離正用劉峻廣絕交論語。英華藐是作狼狽。吳引陸繁弼曰滕王適序歲在己亥信春秋六十有七計逢亂之歲年三十六故引潘岳事自比歷魏仕周至隋開皇元年卒時已六十九矣是賦作於周時故云暮齒。魏文帝燕歌行曰別日何易會日難山川悠遠路漫漫周書王褒傳曰元帝出降褒遂與衆俱出褒曾作燕歌行妙盡關塞寒苦之狀元帝及諸文士並和之而競爲淒切之詞至此方驗焉倪曰子山集中亦有此作。漢書兩龔傳曰兩龔皆楚人也勝字君賓舍字君倩王莽既篡國遣使者拜勝爲講學祭酒勝謂暉(門人高暉)等吾受

漢家厚恩亡以報誼豈以一身事二姓下見故主哉遂不復開口飲食積十四日死有老父來
弔哭甚哀既而曰嗟虜薰以香自燒膏以明自銷龔生竟天天年非吾徒也遂趨而出莫知其
誰文選謝靈運廬陵王墓下作曰楚老惜蘭芳李善注引漢書此傳又引徐州先賢傳曰楚老
者彭城之隱人也倪曰信本楚人爲魏周所逼何異王莽時故引此事深慙楚龔傷其身事二
姓也李詳曰彭城父老與相逢嗟歎相去甚遠後漢書逸民陳留父老傳外黃令陳留張升去
官歸鄉里道逢友人共班草而言升曰吾聞趙殺鳴犢仲尼臨河而反覆巢竭淵龍鳳逝而不
至今宦豎日亂陷害忠良將性命之不免奈何因相抱而泣此事較合步瀛案宜并引下文老
父趨而過之植其杖太息言曰吁二丈夫何泣之悲也夫龍不隱鱗風不藏羽網羅高懸去將
安所泣何及乎與此文語意正合但陳留非楚且傳云不知何許人則楚老二字終以龔生事
爲合古人往往合二事用之。徐樹穀彙注引歸莊曰左傳秦將襲鄭蹇叔之子與師哭而送
之曰晉人禦師必於殺殺有二陵焉其南陵夏后臯之墓也其北陵文王之所避風雨也必死
是問予收爾骨焉(僖三十二年)又左傳申包胥如秦乞師立依于庭牆而哭七日七夜不絕
聲秦哀公爲之賦無衣九頓首而坐秦兵乃出(定四年)倪曰列女傳陶荅子妻曰妾聞南山

有玄豹霧雨七日而不下食者何也欲以澤其毛而成文章故藏而遠害（賢明傳）李詳曰包胥入秦自取道武關不履殺境此歸氏之誕也案戰國楚策言芬冒勃蘇（自注曰即申包胥）羸糧潛行上崢山踰深谿七日而薄秦王之庭在子山當日使周必有陟山沐雨之苦故以豹隱自媿正無容求南山所在也步瀛案淮南子脩務篇曰申包胥羸糧跣足跋涉沿行上崢山赴深谿七日七夜至於秦庭皆子山所本而南山之雨決非泛言既無確證姑付闕疑。孟子離婁下曰伯夷辟紂居北海之濱太公辟紂居東海之濱又見盡心上史記伯夷列傳曰伯夷叔齊不食周粟隱於首陽山采薇而食之。後漢書獨行傳曰范式遷荊州刺史友人南陽孔嵩變姓名爲新野縣阿里街卒正身厲行街中子弟皆服其訓化遂辟公府之京師宿下亭盜共竊其馬尋問知其嵩也乃送馬謝之。水經沔水注曰門水右注漢水謂之高橋谿口案高橋周書作皋橋後漢書獨行傳曰梁鴻至吳依大家皋伯通居廡下爲人賃舂李詳曰太平寰宇記九十一蘇州吳縣皋橋郡國志云閭門內（御覽地部引閭誤通）有皋橋即漢皋通居此以得名梁鴻賃舂之所。史記留侯世家曰戚夫人泣上曰爲我楚舞吾爲若楚歌張平子西京賦曰取樂今日曹子植鬪雞篇曰衆賓進樂方。莊子胠篋篇曰魯酒薄而邯鄲圍漢書東

方朔傳朔曰銷憂者莫若酒。周書追爲作追惟。倪曰漢書藝文志古之王者世有史官左史記言右史記事此賦記梁朝之興亡治亂及身世之飄飄播遷古有詩史此可謂賦史矣。稽叔夜琴賦序曰稱其材幹則以危苦爲上賦其聲音則以悲哀爲主

日暮途遠人閒何世將軍一去大樹飄零壯士不還寒風蕭瑟荆壁睨柱受連城而見欺載書橫階捧珠盤而不定鍾儀君子入就南冠之囚季孫行人留守西河之館申包胥之頓地碎之以首蔡威公之淚盡加之以血釣臺移柳非玉關之可望華亭鶴唳豈河橋之可聞

以上言已奉使被留不得生還也

史記伍子胥傳胥謝申包胥曰吾日暮塗遠吾故倒行而逆施之案遠一作窮非是。吳曰莊子有人閒世篇棄舒崇曰潘岳秋興賦放曠乎人閒之世。大樹將軍見蒼趙王啓注李詳曰周書信傳梁元帝卽位轉右衛將軍封武康縣侯來聘於我屬大軍南討遂留長安案此所謂將軍一去也。壯士二句見思舊銘注。荆壁二句見徐孝穆書注又魏文帝與鍾大理書曰不損連城之價。左襄九年曰晉士莊子爲載書杜注曰載書盟書也孟子告子篇曰五霸桓

公爲盛葵丘之會諸侯束牲載書而不歃血周禮天官玉府曰若合諸侯則共珠槃玉敦鄭注曰古者以槃盛血合諸侯必割牛耳取其血歃之以盟珠槃以盛牛耳尸盟者執之阮元校勘記曰闕本監本槃作盤史記平原君傳曰平原君與楚合從日中不決毛遂按劍歷階而上曰合從者爲楚非爲趙也楚王曰唯唯毛遂曰從定乎楚王曰定矣毛遂奉銅槃而跪進之楚王曰王當歃血而定從遂定從而歸案槃盤字同。左成九年曰晉侯觀于軍府見鍾儀問之曰南冠而縶者誰也有司對曰鄭人所獻楚囚也使稅之召而弔之再拜稽首問其族對曰潁人也使與之琴操南音公語范文子文子曰楚囚君子也樂操土風不忘本也。左昭十三年曰同盟于平邱晉人執季孫意如中行穆子告韓宣子曰爲夷執親將焉用之乃歸季孫惠伯曰諸侯不聞是逃命也請從君惠於會宣子患之使叔魚見季孫曰歸子而不歸鮒也聞諸吏將爲子除館於西河。申包胥見上論衡儒增篇曰禽息碎首以達其友。說苑權謀篇曰下蔡威公閉門而哭三日三夜泣盡而繼以血旁鄰窺牆而問之曰子何故而哭悲若此乎對曰吾國且亡。倪曰釣臺二句未詳按漢書龍朔有玉門關（地理志龍勒屬敦煌郡今甘肅安西縣地）又酒泉郡有玉門關關云漢罷玉門關屯徙其人於此（地理志顏注引案在今甘肅

玉門縣東。班超所謂但願生入玉門關者也。見劉孝儀書注。又按吳志孫權於武昌臨釣臺飲酒大歡。張昭傳。晉陽秋陶侃鎮武昌嘗課諸營種柳。世說新語政事篇注引。又侃嘗整陣於釣臺。晉書陶侃傳。楊柳歌亦云武昌城下誰見移。見子山集。非玉關之可望者大約言征夫遠戍故鄉園柳不能復見也。子山羅縠長安不勝玉關之情矣。李詳曰。上句必與玉關同出。今無所徵。倪引陶侃武昌種柳云云皆近附會。世說新語尤悔篇曰。陸平原河橋敗。爲盧志所讒。被誅。臨刑歎曰。華亭鶴唳可復得乎。又見思舊銘注。周書鶴唳作唳鶴。

孫策以天下爲三分衆。讒一旅項籍用江東之子弟人。惟八千。遂乃分裂山河。宰割天下。豈有百萬義師。一朝卷甲。芟夷斬伐。如草木焉。江淮無涯岸之阻。亭壁無藩籬之固。頭會箕歛者。合從締交。鋤耨棘矜者。因利乘便。將非江表王氣。終於三百年乎。是知并吞六合。不免軼道之災。混一車書。無救平陽之禍。嗚呼。山岳崩頽。旣履危亡之運。春秋迭代。必有去故之悲。天意人事。可以悽愴傷心者矣。

以上追痛梁亡

吳志破虜討逆傳曰。孫堅吳郡富春人。子策字伯符。堅薨。策舅吳景時爲丹陽太守。策乃載母。

就景因緣召募得數百人從袁術術甚奇之以堅部曲還策策乃說術乞助平定江東又曰權稱尊號追諡策曰長沙桓王又評曰割據江東策之基兆也蜀志諸葛亮傳上疏曰今天下三分左哀元年伍員曰少康有田一成有衆一旅吳志陸遜傳遜上疏曰昔桓王創基兵不一旅而開大業。周書纒作裁字通。史記項羽本紀曰項籍者下相人也字羽初起時年二十四其季父項梁使人收下縣得精兵八千人項梁乃以八千人渡江而西又項王曰籍與江東子弟八千人渡江而西。周書項籍作項羽。賈生過秦論曰因利乘便宰割天下分裂河山。孫子軍爭篇曰卷甲而趨。左隱六年曰有國家者見惡如農夫之務去草焉芟夷蘊崇之禮記月令曰虞人入山行木毋有斬伐淮南子兵略篇曰斬之若草木南史侯景傳曰初援兵至北岸衆號百萬百姓携老扶幼以候王師纒過淮便競剝掠互相疑貳景既知援軍號令不一終無勤王之效。爾雅釋水曰重厘岸厘涯字同。過秦論曰曾無藩籬之艱（吳先生曰疑當作限）李詳曰梁書侯景傳景留其中軍王顯貴守壽春出軍僞向合肥遂襲譙州助防董紹先開城降之執刺史豐城侯泰遣王質率兵三千巡江遏防景進攻歷陽歷陽太守莊鐵遣弟均率數百人夜斫景營不克均戰歿蕭正德又遣大船數十艘僞稱載荻實裝濟景至京

口將渡慮王質爲梗俄而質無故退景聞之尙未信也乃密遣覘之謂使者曰質若審退可折江東樹枝爲驗覘人如言而反景大喜曰吾事辦矣乃自采石濟馬數百兵千人京師不自覺案此所謂江淮無涯岸之阻也。史記張耳陳餘傳武臣等至諸縣說其豪桀曰秦爲亂政虐刑以殘賊天下頭會箕斂以供軍費集解引漢書音義曰家家人頭數出穀以箕斂之淮南子人間篇曰大夫箕會於衢許注曰箕會以箕於衢會斂也過秦論曰合從締交相與爲一又曰耒耨棘矜不銛於鉤戟長鑿也漢書陳項列傳贊引過秦顏注引服虔曰耒耨也案耒耨字同王念孫讀書雜誌曰方言曰矜謂之杖棘矜謂伐棘以爲杖也淮南兵略篇曰陳勝伐樵而爲矜義與此同案因利乘便亦過秦論之文見上注。隋書薛道衡傳衡答高穎曰郭璞有云江東偏王三百年還與中國合步瀛案吳自黃龍元年遷都建業至天紀四年共五十二年又自東晉建武元年至梁敬帝太平元年共二百四十年通計二百九十二年。周書終於作應終。過秦論曰秦孝公有并吞八荒之心又曰履至尊而制六合史記秦本紀曰沛公至霸上使人約降子嬰子嬰卽係頸以組白馬素車奉天子璽符降軹道旁集解引徐廣曰在霸陵又引蘇林曰亭名在長安東十三里。干令升晉紀總論曰太康之中天下書同文車同軌吳注

徐炯曰吳志陸績傳績曰從今已去六十年車同軌書同文蓋遙指太康也干寶語本此。晉書懷帝紀曰永嘉五年七月帝蒙塵于平陽劉聰以帝爲會稽公七年春正月劉聰大會使帝著青衣行酒侍中庾珉號哭聰惡之丁未帝遇弑崩于平陽愍帝紀曰建興四年八月劉曜逼京師十一月乙未帝乘羊車肉袒銜璧輿櫬出降五年十二月戊戌帝遇弑崩于平陽清統志曰山西平陽府漢爲河東郡三國魏正始八年始分置平陽郡晉永嘉三年爲劉淵所都又曰平陽故城在臨汾縣西南。周語曰山崩川竭亡之徵也。張平子東京賦曰春秋改節四時迭代楚辭九辨曰愉悅懽朗兮去故而就新。干令升晉記晉武帝革命論曰豈人事乎其天意乎。阮嗣宗詠懷曰悽愴傷我心

况復舟楫路窮，星漢非乘槎可上，風颭道阻，蓬萊無可到之期，窮者欲達其言，勞者須歌其事，陸士衡聞而撫掌，是所甘心，張平子見而陋之，固其宜矣。以上言已不得東歸而作賦

博物志曰舊說云天河與海通近世有人居海渚者年年八月有浮槎去來不失期人有奇志立飛閣於槎上多齎糧乘槎而去奄至一處有城郭狀屋舍甚嚴遙望宮中多織婦見一丈夫牽牛渚次飲之驚問何由至此此人具說來意并問此是何處荅曰君還至蜀郡訪嚴君平則

知之竟不上岸因還如期後至蜀問君平曰某年月日有客星犯牽牛宿計年月正是此人到天河時也。周書楫作楫字同。蓬萊見思舊銘注。晉書王隱傳隱曰古人遭時則以功達其道不遇則以言達其才。文選謝正叔遊西池詩李善引韓詩曰朋友之道缺勞者歌其事詩人伐木自苦其事以爲文。晉書文苑傳曰左思字太冲齊國臨淄人也欲賦三都構思十年初陸機入洛欲爲此賦聞思作之撫掌而笑與弟雲書曰此閒有擔父欲作三都賦須其成當以覆酒甕耳及思賦出機絕歎伏以爲不能加也遂輟筆焉。藝文類聚居處部引張衡西京賦昔班固觀世祖遷都於洛邑懼將必踰溢制度不能遵先聖之立法也故假西都賓盛稱長安舊制有陋洛邑之議而爲東都主人折禮衷以荅之張平子薄而陋之故更造焉案今文選西京賦無此語且與賦亦不類疑是兩京賦序然恐亦非平子爲之殆編平子集者所增耳。錢大昕廿二史攷異曰周書庾信傳陸士衡聞而撫掌云云按撫掌與甘心對陋之與宜矣對此體唐初人多有之王勃滕王閣詩序龍光射牛之墟徐孺下陳蕃之榻龍光牛斗徐孺陳蕃亦句中自爲對也又蘭亭已矣梓澤丘墟已矣疊韻也丘墟雙聲也兩空字對兩實字與庾子山賦同格

我之掌庾承周。以世功而爲族。經邦佐漢。用論道而當官。稟嵩華之玉石。潤河洛之波瀾。居負洛而重世。邑臨河而晏安。逮永嘉之艱虞。始中原之乏主。民枕倚於牆壁。路交橫於豺虎。值五馬之南奔。逢三星之東聚。彼凌江而建國。始播遷於吾祖。分南陽而賜田。裂東嶽而胙土。誅茅宋玉之宅。穿徑臨江之府。水木交運。山川崩竭。家有直道。人多全節。訓子見於瀄深。事君彰於義烈。新野有生祠之廟。河南有胡書之碣。

以上叙世德

林寶元和姓纂曰庾堯時掌庾大夫以官命氏至春秋時周有大夫庾皮皮子過邑於緱氏左昭十二年曰殺獻太子之傅庾皮之子過杜注曰過劉獻公太子之傅又隱八年衆仲曰官有世功則有官族。元和姓纂曰庾漢末居南陽後分赭防（疑當作堵陽）爲新野遂爲郡人後漢司空孟五代孫滔（元作淄誤）晉遂昌太守（滕王迴庾子山集序曰八世祖滔遂昌縣侯隋書技藝傳曰庾季才八世孫滔封遂昌侯則遂昌太守疑亦當作縣侯涉下文新野太

守而誤也）據此則滔之高祖孟後漢時爲司空韓詩外傳八曰三公者何曰司空司馬司徒也續漢書百官志劉昭注引漢官儀曰王莽時定三公之號曰大司馬大司徒大司空世祖卽位因而不改（案建武二十七年改大司馬爲太尉大司徒大司空去大字）考工記曰坐而論道論之王公尙書僞古文周官曰三公論道經邦左傳文十年子舟曰富官而行案庾孟不見後漢書事亦無徵然後漢時爲三公故賦言論道指孟無疑吳注載張尙瓌注以四皓園公姓庾當之乃妄說也或謂漢疑當作晉以庾亮爲司空當之亦未是亮系出潁川信系出新野雖其原相同而至晉已分二系子山必不援爲先祖也。爾雅釋地曰華山爲西嶽嵩高爲中嶽漢書地理志京兆尹華陰原注曰太華山在南潁川郡窰高原注曰武帝置以奉太室山是爲中岳金城郡河關原注曰積石山在西南羌中河水行塞外東北入塞內至章武入海過郡十六行九千四百里弘農郡上雒原注曰禹貢雒水（今禹貢作洛水）出冢領山東北至鞏入河過郡二行千七十里豫州川案姓纂庾氏爲周大夫邑於緄氏後漢始居潁川漢末居南陽皆在豫州之境川有河洛山有嵩高以與河洛相配故并嵩華言之負洛臨河卽承潤河洛之波瀾句子山此賦自序故居原在豫州綜其大勢而言耳耳注家見南朝庾氏或稱新野人

或稱鄢陵人遂以嵩華二句屬潁川負洛二句屬新野而以上河字爲黃河下臨河爲臨淄水一河字前後異解殊覺未安且古人河洛對舉河字皆指黃河無以他水冒之者是皆泥於潁川新野二地遂不免刻舟求劍而按之地勢仍不能密合也。陸繁弼曰晉懷帝改元永嘉之後懷愍遇害劉石繼亂故云中原乏主。後漢書獻帝紀曰建安元年秋七月車駕至洛陽是時宮室燒盡百官披荆棘依墻壁開州郡各擁彊兵而委輸不至羣僚飢乏尙書郎以下自出採稻或飢死墻壁間。漢書叙傳曰據國爭權還爲豺虎王仲宣七哀詩曰西京亂無象豺虎方遘患阮嗣宗詠懷詩曰走獸交橫馳。晉書元帝紀曰太安之際童謠云五馬浮渡江一馬化爲龍及永嘉中歲鎮變惑太白聚斗牛之間識者以爲吳越之地當興王者是歲王室淪覆帝與西陽汝南南頓彭城五王獲濟而帝竟登大位焉案五馬渡江童謠五行志亦載之而浮作游藝文類聚帝王部引晉陽秋亦作浮又晉書天文志曰懷帝永嘉六年七月變惑歲星太白聚牛女之間徘徊進退占曰牛女揚州分是後兩都傾覆而元帝中興揚土。晉書元帝紀曰太興元年三月癸丑愍帝崩問至丙辰百寮上尊號是日即皇帝位。滕王道庾子山集序曰八世祖滔散騎常侍領大著作遂昌縣侯隋書技藝傳曰庾季才八世祖滔隨晉元帝過江

官至散騎常侍封遂昌侯徙居南郡江陵。周書始作此。左僖二十五年曰晉侯朝王與之陽樊溫原攢茅之田晉於是始啓南陽杜注曰在晉山南河北故曰南陽水經清水注曰清水又東南流吳澤清水注之水上承吳陂于脩武縣故城西北脩武故甯也亦曰南陽矣馬季長曰晉地自朝歌以南至軹爲南陽故應劭地理風俗記云河內殷國也周名之爲南陽又曰晉始啓南陽今南陽城是也清統志曰河南懷慶府春秋爲晉南陽軹縣故城在今濟源縣南衛輝府南陽故城在獲嘉縣北朝歌故城在淇縣東北案晉南陽非新野所屬之南陽郡與下東嶽皆借比滔遂昌之封耳晉東陽郡遂昌縣今浙江遂昌縣治。爾雅釋地曰泰山爲東嶽公羊隱八年曰酈者何鄭湯沐之邑也天子有事於泰山諸侯皆從泰山之下諸侯皆有湯沐之邑焉案酈左氏作訪杜注曰在邲邪費縣東南清統志曰山東沂州府費縣故城在今縣西北二十里其外城卽古邲邑也昨土見梁元帝金樓子序注。姚寬西溪叢語曰李君翁詩話卜居云寧誅鋤草茅以力耕乎詩人皆以爲宋玉事豈卜居亦宋玉擬屈原作邪庾信哀江南賦云誅茅宋玉之宅不知何據而言此君翁之陋也唐余知古渚宮故事曰庾信因侯景之亂自建康遁歸江陵居宋玉故宅故其賦云云老杜送李功曹歸荆南詩云曾聞宋玉宅每欲到

荊州李義山亦云可憐留著臨江宅異代應教庾信居（過鄭廣文舊居）倪曰庾氏本新野人今賦所云自潛徙居江陵即是宋玉舊宅非信始居也。史記項羽本紀曰立共敖爲臨江王都江陵清統志曰湖北荊州府江陵故城今府治（今江陵縣）。吳曰南史齊高帝紀河圖讖曰歷年七十水滅緒案宋水德也義熙元年宋武帝王業之始至齊受命七十年又阮孝緒傳齊爲木行胡渭生曰南史明僧紹傳秦始皇季年岷益有山崩淮水竭齊郡僧紹竊謂其弟曰昔伊洛竭而夏亡三川竭岐山崩而周亡五山崩而漢亡夫有國必依山川而爲固山川作變不亡何待今宋德如四代之季爾誌吾言而勿泄也後竟如其言。陸繁弔曰南史庾易傳易祖攷巴郡太守父道驥安西參軍計其時皆仕于宋至易始入齊臨川王薦之直道全節訓子事君等語當指攷道驥無疑攷爲信高祖道驥爲信曾祖。潘安仁西征賦曰穉侯之忠孝瀟深又馬泐督誅曰忠孝義烈之流。元和姓纂曰潛長子會爲新野太守百姓爲立祠支孫庾告雲爲青州刺史羌胡爲之立碑二句正指此二事注家未檢姓纂各逞臆說私撰故事殆不足辨元和郡縣志曰山南道鄧州新野縣普惠帝立新野郡案會爲新野太守當在東晉後也元和志又曰河南道青州永嘉末陷於石勒其後南燕慕容德建都於此宋武帝伐克之爲魏將

慕容白曜所陷遂入後魏又曰河南道海州東海縣宋明帝失淮北地乃於鬱州上僑立青州地後入魏魏改青州爲海州案告雲爲青州刺史未知確在何時然以地勢而言青州固可稱爲河南也

况乃少微真人。天山逸民。階庭空谷。門巷蒲輪。移談講席。就簡書筭。降生世德。載誕貞臣。文詞高于甲觀。模楷盛於漳濱。嗟有道而無鳳。歎非時而有麟。既姦回之獎匿。終不悅於仁人。以上敘其祖父

徐炯曰少微真人以下序信祖易也。藝文類聚人都二十引續陽秋曰謝敷隱居會稽山初月犯少微星一名處士星時戴逵名重於敷時人憂之俄而敷死故會稽士人嘲吳人云吳中高士求死不得晉書天文志曰少微四星在太微西一名處士又曰第一星處士第二星議士第三星博士第四星大夫明大而黃則賢士舉也莊子大宗師曰古之真人其寢不夢其覺無憂又天下篇曰關尹老聃乎古之博大真人哉。易漸象傳曰天下有山漸集解引崔憬曰天喻君子山喻小人小人浸長若山之侵夫君子漸避若天之遠山故言天下有山漸也論語微

子篇逸民集解曰逸民者節行超逸者也後漢書逸民傳序曰易稱遯之時義大矣哉。南齊書高逸傳曰庾易字幼簡新野人也徙居江陵志性恬隱不交外物臨川王映上表薦之餉麥百斛易辭不受建武二年詔復徵爲司徒主簿不就卒胡渭生曰元帝爲肩吾墓誌曰父易高尚其道肥遯貞吉關吏早逢夙表眞人之氣少微曉映還彰隱士之星賦語本此。詩小雅曰皎皎白駒在彼空谷。漢書儒林傳曰上使使束帛如璧安車以蒲裹輪駕駟迎申公武帝紀顏注曰蒲裹輪取其安也倪曰南史劉虬傳云永明三年刺史廬陵王子卿表劉虬及同郡宗測宗尙之庾易劉昭五人請加蒲車束帛之命詔徵之是當時曾以蒲輪徵易也。胡渭生曰管輅別傳曰冀州裴使君檄召輅爲文學從事一相見清論終日天時大熱移牀在庭前樹下乃至雞向晨然後出(見三國魏志方伎傳裴注引案胡引頗有改字今正)案此注未甚確倪引稽康事益不合姑存此以俟考。拾遺記卷四曰蘇秦張儀二人同志好學遇見墳典行途無所題記以墨書掌及服裏夜還而寫之折竹爲簡。詩文有聲曰世德作求。潘安仁西征賦曰貞臣見於國危徐炯曰此下叙信父肩吾也。漢書成帝紀曰元帝在太子宮生甲觀畫堂注應劭曰甲觀在太子宮甲地如淳曰甲觀觀名三輔黃圖云太子宮有甲觀顏曰甲者甲

乙丙丁之次也而應氏以爲在宮之甲地謬矣。後漢書黨錮傳曰學中語曰天下模楷李元禮案漳濱見昭明太子蒼湘東王書注梁簡文爲太子肩吾爲東宮通事舍人累官太子率更令中庶子故以甲觀漳濱爲比彙注引雷琳說水經清漳水注衡漳水逕董仲祠以爲漳濱模楷指董仲舒謬矣。論語子罕篇子曰鳳鳥不至河不出圖吾已矣夫漢書董仲舒傳仲舒對策曰孔子曰鳳鳥不至云云自悲可致此物而身卑賤不得致也。春秋哀十四年春西狩獲麟公羊傳曰麟者仁獸也有王者則至無王者則不至有以告者曰有鬻而角者孔子曰孰爲來哉孰爲來哉涕沾袍曰吾道窮矣家語辨物篇曰孔子曰麟之至爲明王也出非其時而見害吾是以傷焉。詩蕩曰內爨于中國毛傳曰爨怒也不醉而怒曰爨案說文大部曰爨壯大也从三大三目今隸變作爨左太冲魏都賦曰姦回內蟲即爨字之譌周書亦作蟲。集韻作逆今依周書及英華。詩邶柏舟序曰仁人不遇小人在側案陸繁弼引南史庾肩吾傳侯景黨宋子仙破會稽購得肩吾欲殺之然此賦實不專指此一事也

王子洛濱之歲闌成射策之年始含香於建禮仍矯翼於崇賢游滂雷之講肆齒明

離之宵筵。既傾蠡而酌海。遂測管以窺天。方塘水白。釣渚池圓。侍戎韜於武帳。聽雅曲於文絃。乃解懸而通籍。遂崇文而會武。居笠轂而掌兵。出蘭池而典午。論兵於江漢之君。拭玉於西河之主。

以上自敘
仕梁時事

周書太子晉篇曰。晉平公使叔譽于周。見太子晉而與之言。五稱而三窮。歸告公曰。太子晉行年十五。而臣弗能與言。案洛濱見昭明太子書注。吳兆騫曰。庾徐之文。每言一事。必以兩故事出之。子山年十五爲東宮講讀。故用王子洛濱十五之事。爲擬蘭成句。惜無所考。然必十五年之事也。若以己之小字與古人作對。寧有如是文理乎。觀沈約安陸王碑云。王子洛濱之歲。辟疆人侍之年。二語可見。倪曰。滕王道序云。信年十五。侍梁東宮講讀。陸龜蒙小名錄云。蘭成信小字也。又張說過信宅詩云。蘭成追宋玉。舊宅偶詞人。謂信字蘭成。居宋玉故宅也。楊復吉曰。按以蘭成爲信。小字沿襲已久。漢槎辨其非說。頗精確。然如倪氏解。則此二句。本轉捩之處。側遞而下於理。亦自無礙也。步瀛案此賦下云。司徒之表。裡經綸。狐偃之惟王。是勤亦以今古人相對。倪說是也。吳漢槎特疑其不必疑耳。漢書儒林傳。贊曰。自武帝立五經博士。開弟子員。

設科射策勸以官祿蕭望之傳曰以射策甲科爲郎顏注曰射策者謂爲難問疑義書之於策量其大小署爲甲乙之科列而置之不使彰顯有欲射者隨其所取得而釋之以知優劣射之言投射也。初學記職官部上引漢官儀曰尙書郎含雞舌香伏奏事北堂書鈔設官部十二引漢官典職曰尙書郎晝夜更直五日於建禮門內倪曰滕王邁序信解褐授安南府參軍尋轉尙書度支郎故云是矣。楊子雲解嘲曰矯翼厲翮文選東京賦曰昭仁惠於崇賢薛綜注曰崇賢東門名也陸士衡吳王郎中時從梁陳作曰矯迹入崇賢五臣注張銑曰矯舉也崇賢太子門言入此門爲太子洗馬倪曰本傳云累遷尙書度支郎中出爲郢中別駕尋兼通直散騎常侍聘於東魏還爲東宮學士言初爲抄撰學士在東宮至此還爲東宮學士故云仍也。易震象傳曰洊雷震孔疏曰洊者重也又繫辭傳曰主器者莫若長子故受之以震講肆見梁元帝金樓子序注。易離象傳曰明兩作離文選王元長曲水詩序曰入虎闌而齒胄李注曰周禮曰師氏以三德教國子居虎門之左禮記曰行一物而三禮皆得者惟世子而已其齒於學之謂也(文王世子)尙書曰教胄子(今舜典)。漢書東方朔傳荅客難曰語曰以筦闔天以蠡測海注張晏曰蠡瓠瓢也顏曰筦古管字說苑辨篇趙中庶子謂扁鵲曰以管窺天。劉

公幹雜詩曰方塘含白水鮑明遠蕪城賦曰弋林釣渚之館胡渭生曰方塘釣渚謂太子立圃中池也藝文類聚(水部)梁簡文帝有山池詩庾肩吾王臺卿鮑至庾信徐陵皆和王褒有立圃溶池詩本集亦有奉和溶池初成清晨臨泛詩(即藝文類聚所載者)。六韜見齊王碑注漢書汲黯傳曰上嘗坐武帳注孟康曰今御武帳置兵闌五兵於帳中也。琴操曰伏羲作琴五弦象五行也文王武王加二弦合君臣恩也古琴曲有詩歌五曲初學記樂部引釋智匠樂錄曰文王加一武王加一今稱二絃爲文武絃。漢書陳湯傳劉向上疏曰宜以時解縣通籍注孟康曰縣罪未竟也言如縣罰也通籍不禁止令得出入也。樂記曰會以聚衆衆以立武倪曰滕王適序云又爲東宮領直春宮兵馬並受節度蓋任兼文武也。左宣五年曰楚子與若敖氏戰于皋澣伯棼射王汰輶以貫笠轂杜注曰輶車輾汰過也兵車無蓋尊者則邊人執笠依轂而立以禦寒暑名曰笠轂孔疏曰服虔云笠轂轂之蓋如笠所以蔽轂上以禦矢也一日車轂上鐵也或曰兵車旁幔輪謂之笠轂杜以彼爲不安故改之周禮夏官司兵掌五兵五盾。漢書酷吏楊僕傳曰上欲復使將爲其伐前勞以書敕責之曰受詔不至蘭池宮注如淳曰本出軍時欲使之蘭池宮頓而不去蘭池宮在渭城地理志古扶風渭城縣原注曰有蘭池

宮蜀志譙周傳巴蜀文立見周周語次因書板示立曰典午忽兮月沒酉兮典午者謂司馬也
張尙瓊曰因典午爲司馬氏隱語故司馬之官亦借以爲用唐韓愈爲行軍司馬和裴晉公詩
云長慙典午非材職當亦祖此。拭玉見徐孝穆書注周書玉作圭倪曰江漢謂元帝爲湘東
王時也湘東楚地故云江漢西河之主謂東魏也東魏都鄴西河魏地滕王適序云於時江路
有賊梁先主使信與湘東王論中流水戰事醜徒聞其名德遂即散奔深爲梁主所賞是論兵
於江漢之君也又云兼通直常侍於魏土接對有才辯本傳聘於東魏文章辭令甚爲鄴下所
稱是拭玉於西河之主也步瀛案西河戰國初爲魏地故以喻東魏然當時其地實屬西魏也
於時朝野歡娛池臺鐘鼓里爲冠蓋門成鄒魯連茂苑於海陵跨橫塘於江浦東門
則鞭石成橋南極則鑄銅爲柱橋則園植萬株竹則家封千戶西賁浮玉南琛沒羽
吳歆越吟荊豔楚舞草木之遇陽春魚龍之逢風雨五十年中江表無事王歛爲和
親之侯班超爲定遠之使馬武無預於甲兵馮唐不論於將帥

以上述梁承平之盛

張景陽詠史詩曰昔在西京時朝野多歡娛。左昭二十年晏子曰高臺深池撞鐘舞女。冠蓋里見庾愼之謝東宮賜宅啓注。漢書韋賢傳韋孟在鄒詩曰濟濟鄒魯禮義唯恭誦習弦歌于異他邦。漢書枚乘傳乘復說吳王曰夫漢轉粟西鄉陸行不絕水行滿河不如海陵之倉修治上林雜以離宮積聚玩好圜守禽獸不如長洲之苑注引臣瓚曰海陵縣名也有吳太倉文選吳都賦曰佩長洲之茂苑又曰觀海陵之倉則紅粟流衍太平寔字記曰淮南道秦州海陵縣海陵倉卽漢吳王濞之倉也枚乘上書云云謂海渚之陵因以爲倉今已湮滅輿地紀勝曰淮南東路秦州海陵縣以其地並海而高故名案漢臨淮郡海陵縣今江蘇泰縣治。文選吳都賦曰橫塘查下劉淵林注曰橫塘在淮水南近陶家渚（陶字據朱璿校增）緣江築長堤謂之橫塘北接柵塘查下查浦在橫塘西隔內江自山頭南上十里至查浦（胡克家考異謂此注袁本茶陵本無之當爲後人所增）清統志曰江蘇江寧府橫塘在江寧縣西南吳時自江口緣淮築堤謂之橫塘建康志實錄云橫塘在秦淮南近陶家渚查浦在江寧縣西建康志吳時夾淮立柵自石頭南上十里至查浦（皆在今京都）案梁書武帝紀曰天監四年立建興苑於秣陵建興里九年新作緣淮塘北岸起石頭迄東冶南岸起後渚籬門迄三橋故以海

陵橫塘爲比也。史記秦始皇本紀曰立石東海上胸界中以爲秦東門藝文類聚地部引三齊略記曰始皇作石橋欲過河看日出處時有神人能驅石下海石去不速神輒鞭之皆流血至今悉赤。淮南子隴形篇曰使豎亥步自北極至南極太平寰宇記四夷五引林邑記曰馬援樹兩銅柱於象林南界與西屠國分漢之南界陸繁弼曰梁之幅隕東至海南極交趾武帝中大同二年又嘗平交趾斬李賁故引鞭石鑄銅等事。左太冲蜀都賦曰戶有橘柚之園史記貨殖傳曰蜀漢江陵千樹橘渭川千樹竹此其人皆與千戶侯等。說文曰夔會禮也詩泮水曰懷彼淮夷來獻其琛毛傳曰琛寶也顏延年曲水讌詩曰航琛越水輦夔踰障拾遺記（卷一）曰西海之西有浮玉山藝文類聚帝王部引帝王世紀曰堯時饁僂氏來貢沒羽倪曰南史四夷傳曰自晉氏南渡介居江左南徼東邊界壤所接洎宋元嘉撫運援命干戈象浦之絕威震冥海於是鞮譯相係無絕歲時以洎齊梁職貢有序及侯景之亂邊鄙日蹙西靈南琛無聞竹素此敍梁朝全盛之時所以遠方貢賦不絕也。文選吳都賦曰荆豔楚舞吳愉越吟劉淵林注曰豔楚歌也愉吳歌也楚辭曰吳歎蔡謳（招魂）李善注曰曹植妾薄相行曰齊謳楚舞紛紛登樓賦曰莊鳥顯而越吟（莊鳥越吟事見史記陳軫傳）漢書文帝紀元年詔曰方

春和時草木羣生之物皆有以自樂。周書遇作藉。文選琴賦注引樂緯動聲儀曰風雨動魚龍。倪曰南史羊侃傳曰是時梁興四十七年境內無事公卿在位及閭里士大夫莫見兵甲此云五十年者與其成數也徐樹穀曰梁武壬午受禪後改元共七天監十八普通七大通二中大通六大同十一中大同一至太清三年共四十七年。漢書匈奴傳曰長水校尉王欽使匈奴又曰匈奴用事大臣石骨都侯須卜當卽王昭君女伊墨居次云之壻也天鳳元年云當遣人之西河虎猛制虜塞下告邊吏曰欲見和親侯和親侯王欽者王昭君兒子也中部都尉以聞莽遣欽弟騎都尉展德候颯使匈奴顏注曰欽音翁。後漢書班超傳曰超字仲升扶風平陵人也使西域西域五十餘國悉皆納質內屬焉封超爲定遠侯。後漢書臧宮傳曰宮與楊虛侯馬武上書曰匈奴疲困今命將臨塞北虜之滅不過數年詔報曰不如息人自是諸將莫敢言兵事者。馮唐論將見王僧孺爲韋雍表推穀注漢書匈奴傳贊曰顧問馮唐與

論將帥

豈知山嶽閭然江湖潛沸漁陽有閭左戍卒離石有將兵都尉天子方刪詩書定禮樂設重雲之講開士林之學談劫燼之灰飛辨長星之夜落地平魚齒城危獸角臥

刀斗於榮陽。絆龍媒於平樂。宰衡以干戈為兒戲。搢紳以清談為廟略。乘漬水以膠船馭奔駒。以朽索小人則將及水火。君子則方成猿鶴。敝箠不能救鹽池之鹹。阿膠不能止黃河之濁。既而魴魚賴尾。四郊多壘。殿狎江鷗。宮鳴野雉。湛盧去國。餘腥失水。見披髮於伊川。知百年而為戎矣。

以上言梁君臣狃於治安禍機已伏卒有侯景之亂

漢書王莽傳下莽下書曰江湖海澤麻沸。史記秦始皇本紀曰二世皇帝元年七月戌卒陳勝等反故荆地為楚陳涉世家曰陳勝者陽城人也字涉二世元年七月發閭左適戍漁陽九百人屯大澤鄉陳勝吳廣皆次當行為屯長會天大雨道不通度已失期失期法皆斬陳勝吳廣乃謀曰今亡亦死舉大計亦死等死死國可乎殺尉稱大楚索隱曰閭左謂居閭里之左也秦時復除者居閭左今力役凡在閭左者盡發之也又云凡居以富強為右貧弱為左秦役戍多富者役盡兼取貧弱者也適音直革反又音磔故漢書有七科適戍者屯兵而守也地理志漁陽縣名在漁陽郡也正義引括地曰漁陽故城在檀州密雲縣南十八里在漁水之陽也。文選干令升晉紀總論曰彼劉淵者離石之將兵都尉李善注引干寶晉武紀曰太康八年詔

淵領北部都尉晉書載記曰劉元海新興匈奴人冒頓之後也太康末拜北部都尉成都王穎拜元海爲北單于參丞相事元海至左國城劉宣等上大單于之號二旬之間衆已五萬都于離石漢書地理志西河郡有離石縣清統志曰山西汾州府離石故城今永寧州治（今改縣）梁書侯景傳曰景字萬景朔方人或云鴈門人（南史賊臣傳曰魏之懷朔鎮人）驍勇有膂力善騎射以選爲北鎮戍兵稍立功効天柱將爾朱榮委以軍事齊神武帝誅爾朱氏景復以衆降之魏以爲司徒南道行臺擁衆十萬專制河南南史賊臣侯景傳曰景言於高歡曰請兵三萬橫行天下要須濟江縛取蕭衍老公以作太平寺主歡壯其言使擁兵十萬專制河南倪曰漁陽戍卒者侯景起家爲北鎮戍兵也離石都尉者時高歡使擁兵十萬專制河南也。梁書武帝紀曰帝少而篤學洞達儒玄雖萬機多務猶卷不輟手燃燭側光常至戊夜造制旨孝經義周易講疏及六十四卦二繫文言序卦等義樂社義毛詩答問春秋答問尙書大義中庸講疏孔子正言老子講疏凡二百餘卷天監初何佟之賀瑒嚴植之明山賓等覆述制旨並撰吉凶軍賓嘉五禮凡一千餘卷高祖稱制斷疑大同中於臺西立士林館領軍朱异太府卿賀琛舍人孔子袂等遞相講述兼篤信正法尤長釋典製滄盤大品淨名三慧諸經義記復數百

卷聽覽餘閑卽於重雲殿及同泰寺講說名僧碩學四部聽衆常萬餘人又蕭子暉傳曰嘗預重雲殿聽制講三慧經陳書虞荔傳曰梁武帝於城西置士林館荔乃製碑奏上帝命勒之于館仍用荔爲士林學士。搜神記卷十三曰漢武帝鑿昆明池極深悉是灰墨無復土舉朝不解以問東方朔朔曰臣愚不足以知之試問西域人至後漢明帝時西域道人入來洛陽時有憶朔言者乃試以武帝時灰墨問之道人云經云天地將盡則劫燒此劫燒之餘也。文選頭陀寺碑文李善注引顧徽吳縣記曰佛法詳其始而典籍亦無聞焉魯莊七年夜明佛生之日也又引瑞應經曰到四月八日夜明星出時佛從右脇墮地卽行七步庾肩吾詠同泰寺浮圖詩云周星疑史落卽其事也而其年代諸說不同謝承後漢書曰佛以癸丑七月十五日託生於淨住國摩耶夫人腹中至周莊王十年甲寅四月八日始生（歲華紀麗卷三路史發揮卷三注引魏書釋老志曰釋迦生時當周莊王九年春秋魯莊公七年夏四月恆星不見夜明是也與謝書相差一年以史記十二諸侯年表證之則謝書爲合王應麟困學紀聞卷二十曰按春秋莊公七年夏四月辛卯恆星不見正義曰於是時周之四月則夏之仲春杜氏以長歷較之知辛卯是四月五日也以是攷之夜恆星不見乃二月五日非四月八日也據此則謝書所

載亦不足信廣弘明集卷十一法琳引周書異記曰昭王即位二十四年甲寅四月八日江河泉池忽然泛漲井泉並皆溢出宮殿人舍山川大地咸悉震動其夜五色光氣入貫紫微遍于西方盡作青紅色周昭王問太蘇由曰此何祥也由對曰有大聖人生於西方故現此瑞佛道論衡佛運紀統皆同此說今本竹書紀年昭王十四年夏四月恆星不見孫之懃引周書異記亦改爲十四年殊妄朱瑋文選集釋則據僞竹書正之其失亦不待辨而昭王莖王相距絕遠要皆黠僧陋儒傳會其事故多不相合姑存而不論可也此賦云辨長星之夜落豈梁武時亦有所攷證歟。左襄十八年曰楚師伐鄭次于魚陵又曰涉于魚齒之下杜注曰魚陵魚齒山也在南陽鄧縣北案晉南陽國鄧縣今河南魯山縣東南。呂氏春秋行論篇曰鯀爲諸侯欲得三公怒甚猛獸欲以爲亂比獸之角能以爲城。漢書李廣傳曰不擊刁斗自衛顏注引孟康曰刁斗以銅作鐃受一斗晝炊飯食夜擊持行夜名曰刁斗今在灤陽庫中也。漢書禮樂志郊祀歌天馬曰天馬徠龍之媒應劭曰言天馬者乃神龍之類今天馬已來此龍必至之效也步瀛案平樂廡名漢書景武昭宣元成功臣表曰義陽侯傅介子以平樂廡監使誅樓蘭王斬首侯傅介子傳曰遷平樂監即謂平樂廡監王先謙謂此廡字是也注庚賦者以平樂館有

銅馬以觀名解之非是然胡三省注通鑑傅介子爲平樂監已有此誤矣。漢書王莽傳上曰采伊尹周公稱號加公爲宰衡史記絳侯世家文帝曰曩者霸上棘門軍若兒戲耳。史記司馬相如傳難蜀父老曰耆老大夫搢紳先生之徒世說新語賞譽篇注引晉陽秋曰尙書令衛瓘見樂廣曰昔何平叔諸人沒常謂清言盡矣今復聞之於君又曰太尉王夷甫光祿大夫裴叔則能清言後漢書鄭太傅太答董卓曰孔公緒清談高論晉書羊祜傳武帝詔曰內經廟略案梁書朱异傳曰自周捨卒後异代掌機謀太清二年高祖夢中原平舉朝稱慶且以語异异對曰此字內方一之徵及侯景歸降敕召厚臣議异探高祖微旨應聲答曰今若不容恐絕後來之望願陛下無疑高祖深納异言又感前夢遂納之及貞陽敗沒自魏遣使還流魏相高澄欲更申和睦敕有司定議异又以和爲允高祖果從之是時侯景鎮壽累啟絕和又致書與异辭意甚切异但述敕旨以報之八月景遂舉兵反以討异爲名景初謀反合州刺史隸陽王範司州刺史羊鴉仁玆累有啓聞异逆抑而不奏故朝廷不爲之備及寇至城內文武咸尤之皇太子又製圍城賦云四郊以之多壘萬邦以之未綏問豺狼其何者訪虺蜴之爲誰蓋以指异异因慙憤發病卒异居權要三十餘年善窺人主意曲能阿諛以承上旨故特被寵任。周書

摺作縉。吳引王濬曰漬水疑作積水見莊子步瀛案逍遙遊曰水之積也不厚則不負大舟也作積字殆是史記周本紀正義引帝王世紀曰昭王德衰南征濟於漢船人惡之以膠船進王王御船至中流膠液船解王及祭公俱沒於水中而崩。周書以膠船作而。書僞古文五子之歌曰懷乎若朽索之馭六馬孟子滕文公篇曰其君子實立黃於篋以迎其君子其小人簞食壺漿以迎其小人救民於水火之中取其殘而已矣。太平御覽妖異部引抱朴子曰周穆王南征一軍盡化君子爲獫爲鶴小人爲蟲爲沙今本抱朴子釋滯篇作三軍之衆一朝盡化君子爲鶴小人成沙。簞蓋篋字之誤說文曰篋蔽也所以蔽甌底者也（案與篋字異）孔融同歲論曰弊篋徑尺不足以救鹽池之鹹阿膠徑寸不能止黃河之濁（見太平御覽器物部二及雜物部一引）抱朴子嘉遁篇曰寸膠不能治黃河之濁。周書敝作弊弊乃敝之借字。詩汝墳曰魴魚賴尾王室如燬毛傳曰賴赤也魚勞則尾赤。禮記曲禮上曰四郊多壘此卿大夫之辱也鄭注曰壘軍壁也數見侵伐則多壘荒穢也。晉書五行志曰成帝咸和二年正月有五鷗鳥集殿庭是時庾亮苟違衆謀將召蘇峻有言不從之咎故白祥先見也三年二月峻果作亂宮掖焚毀又宋書五行志曰文帝元嘉二年春有江鷗鳥數百集太極殿

前小階內明年誅徐羨之等。漢書五行志曰京房易傳曰人君暴虐鳥焚其舍鴻嘉二年三月博士行大射禮有飛雉集于庭歷階登堂而讎後雉又集未央宮承明殿屋上又宋書武二王傳曰彭城王義康東府聽事前井水忽涌溢野雉江鷗並飛入所住齋前。越絕書記寶劍曰闔廬無道子女死殺生以送之澆盧之劍去之如水行秦過楚楚王臥而寤得吳子澆盧之劍吳越春秋闔廬內傳曰楚昭王臥而得吳王澆盧之劍於牀乃召風胡子而問曰是何劍也風胡子曰此謂澆盧之劍人君有逆理之謀其劍即出故去無道以就有道今吳王無道殺君謀楚故澆盧入楚。離離見思舊銘注周書體作皇。左僖二十二年曰初平王之東遷也辛有適伊川見被髮而祭於野者曰不及百年此其戎乎其禮先亡矣秋秦晉遷陸渾之戎於伊川杜注曰伊川周地伊水也允姓之戎居陸渾在秦晉西北二國誘而遷之伊川遂從戎號至今爲陸渾縣也江永曰陸渾戎今河南府嵩縣古伊闕地伊川今河南汝州伊陽縣也倪曰此言侯景之來也。周書百年而三字作其時

彼姦逆之熾盛。久遊魂而放命。大則有鯨有鯢。小則爲梟爲獍。負其牛羊之力。凶其水草之性。非玉燭之能調。豈璫璣之可正。值天下之無爲。尙有欲於羈縻。飲其琉璃。

之酒賞其虎豹之皮見胡柯於大夏識鳥卵於條支豺牙密厲虺毒潛吹輕九鼎而

欲問聞三川而遂窺

以上叙侯景內附

後漢書謝夷吾傳夷吾曰遊魂假息非刑所加書堯典方命圯族釋文引徐曰鄭王音放孔疏曰鄭王以方爲放謂放棄教命梁書侯景傳曰太清元年景遣其行臺郎中丁和來上表請降高祖召羣臣廷議尙書僕射謝舉及百辟等議皆云納侯景非宜高祖不從是議而納景又梁書蕭介傳曰太清中侯景於渦陽敗走入壽陽高祖敕防主韋默納之介聞而上表曰臣聞凶人之性不移天下之惡一也侯景獸心之種鳴鏑之類以凶狡之才荷高歡翼長之遇位忝台司任居方伯然而高歡墳土未乾卽還反矚逆力不逮乃復逃死關西宇文不容故復投身於我棄鄉關如脫履背君親如遺芥云云胡渭生曰所謂游魂放命者此也。左宣十二年楚子曰古者明王伐不敬取其鯨獍而封之以爲大戮於是乎有京觀以懲淫慝杜注曰鯨鮪大魚名以喻不義之人吞食小國。史記封禪書曰祠黃帝用一梟破鏡孝武本紀集解引孟康曰梟鳥名食母破鏡獸名食父黃帝欲絕其類使百物祠皆用之破鏡如龜而虎眼（漢書郊祀

志上注引百物作百吏。沈異記曰獾狀如虎豹而小始生還食其母徐炯曰破鏡省作鏡又訛成獾。晉書載記劉聰傳崔懿之曰斬準梟聲獾形必爲國患。漢書匈奴傳曰其畜之所多則馬牛羊逐水草遷徙。又楊雄上書曰外國天性忿鷙負力怙氣。爾雅釋天曰四氣和謂之玉燭。釋文引李巡曰人君德美如玉而明若燭。書舜典曰在璿璣玉衡以齊七政。史記司馬相如傳難蜀父老曰蓋聞天子之於夷狄也其義羈縻勿絕而已。索隱曰羈馬絡頭也。縻牛韁也。漢官儀馬云羈牛云縻言制四夷如牛馬之受羈縻也。琉璃與留犁同。己見齊王憲碑注。左襄四年曰無終子嘉父使孟樂如晉。因魏莊子納虎豹之皮以求和諸戎。史記大宛傳曰大宛在大宛西南二千餘里。媯水南張騫曰臣在大夏時見邛竹杖。蜀布問曰安得此。大夏國人曰吾賈人往市之。身毒身毒在大夏東南可數千里。案大夏在布哈爾南部。阿母河南卽鄂勒推帕阿母河卽媯水也。案詩淇露孔疏曰柯謂枝也。此胡柯蓋卽指邛竹杖也。又案胡柯周書作胡桐。漢書西域傳曰鄯善國多胡桐。大宛傳曰條枝在安息西數千里。臨西海有大鳥卵如甕。漢書西域傳作條支。後漢書西域傳曰條支國城在山上。周回四十餘里。臨西海海水曲環其南及東北三面。路絕唯西北隅通陸道。出大雀其卵如甕。案條支卽今阿刺伯

西海卽紅海也大鳥卽駝鳥。文選孫子荆爲石仲容與孫皓書曰豺狼抗爪牙之毒。孔叢子嘉言篇曰梁邱據遇虺毒三旬而後瘳爾雅釋魚曰蝮虺博三寸首大如擘郭注曰身廣三寸頭大如擘指此自一種蛇名爲蝮虺案虺說文爲蜥易爾雅蝮虺乃虫之借字說文曰虫一名蝮博三寸首大如擘指卽郭注所本。左宣三年曰楚子伐陸渾之戎遂至於雒觀兵於周疆定王使王孫滿勞楚子楚子問鼎之大小輕重焉對曰在德不在鼎昔夏之方有法也遠方圖物貢金九牧鑄鼎象物使民知神姦又桓二年臧哀伯曰昔武王克商遷九鼎於洛邑。秦策秦武王謂甘茂曰寡人欲車通三川以闢周室史記秦本紀初置三川郡集解引韋昭曰有河洛伊故曰三川

始則王子召戎。姦臣介冑。旣官政而離湯。遂師言而泄漏。望廷尉之逋囚。反淮南之窮寇。出秋泉之蒼鳥。起橫江之困獸。地則石鼓鳴山。天則金精動宿。北闕龍吟。東陵

麟鬪。

以上叙臨賀王通侯景

梁書侯景傳曰景知臨賀王正德怨望朝廷密令要結正德許爲內啓八月景遂發兵反十月

景留其中軍王顯貴守壽春城出軍僞向合肥遂襲譙州助防董紹先開城降之高祖遣太子家令王質率兵三千巡江渴防景進攻歷陽歷陽太守莊鐵又降之蕭正德先遣大船數十艘僞稱載荻實裝濟景至京口將渡慮王質爲梗俄而質無故退景乃自采石濟馬數百匹兵千人京師不之覺既而景至朱雀航蕭正德先屯丹陽郡至是率所部與景合又臨賀王正德傳曰正德字公和臨川靖惠王(弘)第三子也初高祖未有男養之爲子及高祖踐極便希儲貳後立昭明太子封正德爲西豐侯自此怨望恆懷不軌封臨賀郡王又加左衛將軍而凶暴日甚招聚亡命侯景知其有姦心乃密令誘說厚相婁結遣正德書大喜遂許之及景至江正德潛通空舫詐稱迎荻以濟景爲朝廷未知其謀猶遣正德守朱雀航景至正德乃引軍與景俱進景推正德爲天子改年爲正平元年景爲丞相臺城沒復太清之號降正德爲大司馬正德有怨言景矯詔殺之。左僖十一年曰揚拒泉臯維伊之戎同伐京師入王城焚東門王子帶召之也。曲禮上曰介冑則有不可犯之色吳曰姦臣即指正德。左襄十四年曰晉將執戎子駒支范宣子親數諸朝曰今諸侯之事我寡君不如昔者蓋言語漏洩則職女之由詰朝之事爾無與焉與將執女對曰殺之役晉禦其上戎亢其下秦師不復我諸戎實然自是以來

晉之百役與我諸戎相繼于時以從執政猶殺志也豈敢離邊釋文曰邊他歷反說文曰逖遠也邊古文从易聲。左僖二年曰齊寺人貂始漏師于多魚杜注曰寺人內奄官豎貂也多魚地名闕傳言貂於此擅貴竊漏洩桓公軍事胡渭生曰武帝既納侯景而復與高澄通好使景自疑所謂官政離邊也淵明使夏侯僧辯還過壽陽景攝問具服得淵明報書（見南史賊臣侯景傳）所謂師言泄漏也。廷尉旬見吳明徹墓誌銘注。魏志諸葛誕傳曰甘露元年誕求臨淮築城以備寇內欲保有淮南朝廷微知誕有自疑心二年微爲司空誕被詔書愈恐遂反吳人遣將唐咨王祚等率三萬衆來應六月大將軍司馬文王（昭）督中外諸軍六萬衆臨淮討之誕咨等智力窮大將軍乃自臨圍四面進兵同時鼓譟登城誕突小城門出大將軍司馬胡奮部兵逆擊斬誕孫子軍爭篇曰窮寇勿迫。狄泉蒼鳥已見思舊銘注。周書出作飛。太平寰宇記曰淮南道和州歷陽縣橫江浦在縣東南二十六里建安初孫策自壽春欲經略江東揚州刺史劉繇遣將樊能于糜屯橫江孫策破之于此左宣十二年士貞子曰文公曰困獸猶鬪况國相乎案橫江困獸必別有實事俟考。晉書五行志曰吳興長城夏架山有石鼓長丈餘面徑三尺許鳴則三吳有兵梁書武帝紀曰普通二年八月始平郡中石鼓村地自

開成井。漢書五行志曰太白曰西方秋金太白經天天下革民更王是爲亂紀人民流亡御覽天部引尙書考靈曜曰太白金精也梁書武帝紀曰太清三年春正月乙酉太白晝見釋名釋天曰宿(音秀)宿也星各止宿其處也(下一宿字音夙)。史記高祖本紀曰八年蕭丞相營作未央宮立東闕北闕集解引關中記曰東有蒼龍闕北有玄武闕玄武所謂北闕晉書天文志曰軒轅十七星一曰東陵文選張平子歸田賦李善注引春秋元命苞曰杓星高則羣龍吟初學記天部引元命苞曰麟龍鬪日月薄蝕淮南子天文篇曰龍舉而景雲屬麒麟鬪而日月蝕梁書武紀曰普通五年六月乙酉龍鬪于曲阿王陂因西行至建陵城所經處樹木倒折開地數十丈中大同元年春正月丁未曲阿縣建陵隧口石麒麟動有大蛇鬪隧中其一被傷奔走(南史梁本紀曰武帝追尊皇考爲文皇帝廟號太祖陵曰建陵)

爾乃桀黠構扇馮陵畿甸擁狼望於黃圖填廬山於赤縣青袍如草白馬如練天子履端廢朝單于長圍高宴兩觀當戟千門受箭白虹貫日蒼鷹擊殿竟遭夏臺之禍終視堯城之變官守無奔問之人干戚非平戎之戰陶侃空爭米船顧榮虛搖羽扇

以上叙景園臺
城而援軍不進

史記貨殖傳曰桀黜奴人之所患也宋書謝靈運傳曰靈運構扇異同。左襄八年鄭使王子伯駢告於晉曰馮陵我城郭杜注曰馮迫也釋文曰馮皮冰反周禮夏官職方氏曰方千里曰王畿又天官序官鄭注曰郊外曰甸大宰之職三曰邦甸之賦注曰四郊去國百里邦甸二百里此畿內之甸也職方氏又曰其外方五百里爲侯服又其外方五百里爲甸服此畿外之甸服也周語祭公謀父曰夫先王之制邦內甸服韋注曰邦內謂天子畿內千里之地商頌曰邦畿千里維民所止王制曰千里之內曰甸京邑在其中央故夏書曰五百里甸服則古今同矣自商以前并畿內爲五服武王克殷周公致太平因禹所禘除甸內更制天子爲九服千里之內謂之王畿王畿之外曰侯服侯服之外曰甸服今謀父諫穆王稱先王之制猶以王畿爲甸服者甸古名世俗所習也韋注言甸服之沿革甚晰至小司徒之四丘爲甸則別爲一義與此二者皆不同。漢書甸奴傳楊雄上書曰前世豈樂傾無量之費役無罪之人快心於狼望之北哉顏注曰狼望甸奴中地名也胡三省通鑑注曰邊人謂烽燧爲狼火狼望謂狼煙候望之地隋書經籍志史部地理類有黃圖一卷注云記三輔宮觀陵廟明堂辟雍郊時等事。甸奴

傳楊雄上書又曰運府庫之財填廬山之壑顏注曰廬匈奴中山也史記孟子荀卿列傳曰鄒衍以爲儒者所謂中國者於天下乃八十一分居其一分耳中國名曰赤縣神州。南史侯景傳曰大同中童謠云青絲白馬壽陽來先是景渦陽之敗求錦朝廷但給青布及是皆用爲袍采色尙青景乘白馬青絲爲轡欲以應謠又曰景纂修飾臺城童謠曰脫青袍著芒屨荊州天子挺應著古詩曰青袍似春草論衡書虛篇曰傳書或言顏淵與孔子俱上魯太山孔子東南望吳闔闔門外有繫白馬引顏淵指以示之曰若見吳闔門乎顏淵曰見之孔子曰門外何有曰有如繫練之狀。左文元年曰先王之正時也履端於始杜注曰步歷之始以爲術之端御覽時序部十四引續漢書曰永平四年詔曰比來水旱飢饉加有軍旅正旦無陳朝賀之儀又引臧榮緒晉書曰履端元日正始之初。史記匈奴傳集解引漢書音義曰單于者廣大之言貌其象天單于然漢書文帝紀顏注曰單于匈奴天子之號也單音蟬案此以冒頓單于圍漢高祖于白登爲喻倪注謂侯景嘗爲百日天子故稱單于泥矣梁書景傳曰景乘勝至闕下于是百道攻城燒大司馬東西華諸門城中倉卒未有其備乃鑿門樓下水沃火久之方滅賊又斫東掖門將開羊楨鑿門扇刺殺數人賊乃退景又燒城西馬廐士林館太府寺明日景又作

木驢數百攻城城上飛石擲之所值皆碎破景苦攻不克傷損甚多乃止攻築長圍以絕內外。公羊傳昭二十五年何休注曰天子闕兩觀禮運疏曰爾雅釋宮云觀謂之闕孫炎云宮門雙觀者舊懸法象使民觀之處因謂之闕漢書息夫躬傳躬上疏曰卒有彊弩圍城長戟指闕陛下誰與備之。史記封禪書曰作建章宮度爲千門萬戶梁書侯景傳曰賊又登東宮牆射城內太宗募人出燒東宮東宮臺殿遂盡。魏策四唐且曰聶政之刺韓傀也白虹貫日晏離之刺慶忌也倉鷹擊於殿上梁書武紀曰太清元年二月己卯白虹貫日南史梁武帝紀曰太清三年正月庚申白虹貫日三重。史記夏本紀曰桀迺召湯而囚之夏臺索隱曰獄名夏曰鈞臺皇甫謐云地在陽翟是也。周書竟作競。水經瓠子河水注曰小成陽在成陽西北半里許實中俗曠以爲囚堯城史記五帝本紀正義引括地志曰故堯城在濮州鄆城縣東北十五里竹書云昔堯德衰爲舜所囚也。周書終作遂。左僖二十四年曰王使來告難臧文仲對曰天子蒙塵于外敢不奔問官守杜注曰官守王之羣臣。淮南子謬稱篇曰禹執干戚舞於兩階之間而三苗服記論篇曰舜執干戚而服有苗。晉書陶侃傳曰蘇峻作逆京都都不守平南將軍溫嶠要侃同赴朝廷因推爲盟主溫嶠傳曰是時義軍屢戰失利嶠軍食盡陶侃怒

曰使君前云不憂無將士惟得老僕爲主耳今數戰皆北良將安在荊州接胡蜀二虜倉廩當備不虞若復無食僕便欲西歸更思良算嶠曰不然自古成監師克在和公若違衆獨反人心必沮沮衆敗事義旗將迴指於公矣侃遂留不去通鑑（九十四）晉紀曰竟陵太守李陽說侃侃乃分米五萬石以餉嶠軍。晉書顧榮傳曰廣陵相陳敏反假榮右將軍丹陽內史周圯與榮及甘卓紀瞻潛謀起兵攻敏榮發橋斂舟於南岸敏率萬餘人出不獲濟榮麾以羽扇其衆潰散案二句時喻授軍之無功耳侃注以王琳有沈米事以爲陶侃比王琳顧榮比羊鴉仁非是此統言諸軍以私見相仇無退賊之策不專屬一二人也通鑑（一百六十一）梁紀曰太清二年十一月邵陵王綸帥西豐公大春新塗公大成永安侯確安南侯駿前譙州刺史趙伯超武州刺史蕭弄璋等步騎三萬自京口西上乙酉綸進軍玄武湖側景擊之諸軍皆潰綸奔朱方鬪陽王範遣其世子嗣與西豫州刺史裴之高建安太守趙鳳舉各將兵入援軍于蔡洲上徵衡州刺史韋粲爲散騎常侍還至廬陵聞候景亂粲簡閱部下得精兵五千倍道赴援司州刺史柳仲禮亦率步騎萬人至橫江丙辰夜粲仲禮及宣猛將軍李孝欽前司州刺史羊鴉仁南陵太守陳文徹合軍屯新林王游苑推仲禮爲大都督仲禮令粲頓青塘太清三年春

正月丁巳朔侯景攻粲粲戰死邵陵王綸復收散卒與東陽州刺史臨城公大連新澁公大成等自東道並至亦推柳仲禮爲大都督仲禮陵蔑諸將與綸及大連深相仇怨大連又與確有隙諸軍互相猜阻莫有戰心援軍初至建康士民扶老携幼以候之纔過淮即縱兵剽掠由是士民失望賊中有謀應官軍者聞之亦止。周書陶侃顧榮下各有則字爭作裝此依英華

將軍死綏路絕重圍烽隨星落書逐鳶飛遂乃韓分趙裂鼓臥旗折失羣班馬迷輪亂轍猛士嬰城謀臣卷舌昆陽之戰象走林常山之陣蛇奔穴五郡則兄弟相悲三州則父子離別

以上叙援軍之敗人民遭禍

梁書景傳曰初景至便望克定京師號令甚明不犯百姓既攻城不下人心離阻又恐援軍總集衆必潰散乃縱兵殺掠交屍塞路富室豪家恣意剝子女妻妾悉入軍營及築土山不限貴賤晝夜不息亂加毆捶疲羸者因投之以填山號哭之聲響動天地又曰景食稍盡至米斛數十萬人相食者十五六。文選奏彈曹景宗李善注引司馬法曰將軍死綏注曰綏却也。

漢書賈誼傳注引文穎曰邊方備胡寇作高土櫓櫓上作桔皋桔皋頭作兜零以薪草置其中常低之有寇卽然火舉之以相告曰烽又多積薪寇至卽然之以望其煙曰燧顏曰晝則燔燧夜則舉烽吳曰梁書侯景傳太清三年三月朔日城內以景違盟舉烽鼓譟步瀛案後人注此賦者多取史所載之文偶有相同輒引爲證然烽燧候敵恐不但侯景昔盟時爲然賦亦未必專指此事也惟下句鳶飛則似指紙鴉事。淮南子齊物篇曰魯般墨子以木爲鳶而飛之日不集吳曰南史侯景傳賊之始至城中纔得固守平蕩之事期望援軍旣而中外斷絕有羊車兒獻計作紙鴉繫以長繩藏勅于中簡文出太極殿因西北風而放冀得書達羣賊又射下之（吳引頗多改竄今正）。韓策一張儀說韓王曰夫塞成皋絕上黨則王之國分矣秦策五司空馬說趙王曰大王裂趙之半以賂秦。後漢書隗囂傳囂等移檄告郡國曰囊弓臥鼓李注曰臥息也晉書陸機傳曰機臨戎而牙旗折左倪曰以下言援師之敗侯景攻城之急也。左襄十八年邢伯告中行伯曰有班馬之聲齊師其遁杜注曰夜遁馬不相見故鳴班別也。左莊十年曹瀾曰吾視其轍亂望其旗靡故逐之。漢書繡通傳通曰必將嬰城固守。文選楊子雲劇秦美新曰卷其舌而不談。後漢書光武帝紀曰光武與諸將徇昆陽王尋王邑

將兵百萬又驅諸猛獸虎豹犀象之屬以助威武光武與營部俱進連勝遂前諸將膽氣益壯無不一當百光武乃與敢死者三千人從城西水上衝其中堅尋邑陳亂乘銳崩之遂殺王尋城中亦鼓譟而出震呼動天地會大雷風屋瓦皆飛雨下如注潁川盛溢虎豹皆股戰士卒爭赴溺死者以萬數水爲不流左宣十二年曰趙旃棄車而走林。孫子九地篇曰故善用兵者譬如率然率然者常山之蛇也擊其首則尾至擊其尾則首至擊其中則首尾俱至晉書叛逆桓溫傳曰初諸葛亮造八陣圖於魚復平沙之上壘石爲八行行相去二丈溫見之謂此常山蛇勢也文武皆莫能識之。倪曰搜神記曰世說云五郡之人各是異財而逢喪亂常山一人安定一人襄陵一人（陵疑當作陽漢魏叢書本稗海本皆作陵蓋涉下博陵而誤）博陵一人（止叙四人疑脫誤）悉皆孤獨俱行衛國同至樹陰因相問姓名各言離亂惻然相謂曰我等皆無骨肉今日幸得聚會亦天然也因結義爲兄弟長字仲伯次名文仲次名季仲次名叔仲次名雅仲五人相將詣衛國中見一老母孤單告乞五人收養侍奉敬如親母三年母疾五人憂愁不能寢食母曰吾是并州太原人董世臺之女嫁同郡張文賢爲妻任北海太守因遭荒亂文賢早亡葬在太原赤山之下吾死後汝等若能與我送葬到塚側吾願畢矣吾遭荒

之日有一子姓張名遺年七歲胸中有七鱸（當作鱸）足下有通徹之紋他日有如此子即我子也言訖而卒五人扶喪至太原忽叔仲橫被朝歌令禁繫時有一人走投太守言養母之狀述并葬之由因話男之形狀太守聞之號哭擗地曰此吾母也乃發使往朝歌迎喪并具表聞奏於魏帝善其人義重可以旌之各爲太守（此見漢魏叢書及稗海八卷本卷四津逮秘書二十卷本無此條）。太平廣記卷一百六十一引孝子傳曰晉三州人約爲父子父令二人作舍於大澤中欲成父曰不如河邊乃徙焉又幾成父曰不如河中二人乃負土填河三旬不立有書生過爲縛兩豚投河中父曰何嘗見江河可填邪吾觀汝行耳明日迴至河邊河中土爲高丈餘廣袤十餘里因居其上吳曰南史侯景傳曰景之亂也或父子携手共入江湖或兄弟相要俱緣山岳于時千里絕煙人跡罕見步瀛案兄弟父子蓋指民間逃亡者言吳注引景傳是也倪注謂五郡指湘東邵陵武陵廬陵南康三州指荊州益州郢州恐近傅會是時廬陵王續南康王績早亡則上句無著且子山傷心賦亦有兄弟則五郡分張父子則三州離散二語並與此同古人之文意本明顯往往有後人求之過深轉失之者此類是也

護軍慷慨忠能死節三世爲將終於此滅濟陽忠壯身參末將兄弟三人義聲俱唱

主辱臣死名存身喪敵人歸元三軍悽愴尚書多算守備是長雲梯可拒地道能防
有齊將之閉壁無燕師之臥牆大事去矣人之云云申子奮發勇氣咆勃實總元戎
身先士卒宵落魚門兵填馬窟屢犯通中頻遭刮骨功業天枉身名埋沒

以上叙韋
江羊柳諸

將

護軍四句叙韋粲戰死梁書韋粲傳曰粲字長禧車騎軍叡之孫北徐州刺史放之子也柳仲
禮入粲營部分衆軍日日將戰諸將各有據守令粲頓青塘青塘當石頭中路粲慮柵壘未立
賊必爭之仲禮曰青塘立柵迫近淮渚欲以糧儲船乘盡就泊之此是大事非兄不可若疑兵
少當更差軍相助乃使直閣將軍劉叔胤助粲帥所部水陸俱進時值昏霧軍人迷失道比及
青塘夜已過半壘柵至曉未立登景禪靈寺門閣望粲營未立便率銳卒來攻粲令軍主鄭逸
逆擊之命劉叔胤以水軍截其後叔胤畏懦不敢進逸遂敗賊乘勝入營左右牽粲避賊粲不
動猶叱子弟力戰兵死略盡遂見害時年五十四粲子尼及三弟助警構從弟昂皆戰死親戚

死者數百人賊傳祭首闕下以示城內太宗聞之流涕曰社稷所寄惟韋公如何不幸先死行陣詔贈護軍將軍世祖平倭景追謚曰忠貞。史記王翦傳曰陳勝之反秦秦使王翦之孫王離擊趙或曰王離秦之名將也今將疆秦之兵攻新造之趙舉之必矣客曰不然夫爲將三世者必敗今王離已三世將矣居無何項羽救趙虜王離倪曰三世爲將謂祭祖報父放與祭三世俱爲將也。英華三作二誤。濟陽八句敘江子一兄弟戰死也梁書江子一傳曰子一字元貞(南史作元亮)濟陽考城人爲戎昭將軍南津校尉兄弟性茲剛烈賊至子一啓太宗請與其弟子四子五帥所領百餘人開承明門挑賊許之子一乃身先士卒抽戈獨進羣賊夾攻之從者莫敢繼子四子五見事急相引赴賊並見害南史子一傳曰子一及弟尙書左丞子四東宮殿主子五並力戰直前賊並坐甲不起子一引稍撞之賊縱突騎衆并縮子一刺其騎騎倒稍折賊解其肩時年六十二弟曰與兄俱出何面獨旋乃免胄赴敵子四稍洞胸死子五傷眼還至塹一慟而絕賊義子一之勇歸之面如生詔贈子一侍中黃門侍郎子四中書侍郎子五散騎常侍侯景平元帝謚子一義子子四毅子子五烈子。越語范蠡曰臣聞之爲人臣者君憂臣勞君辱臣死史記越王句踐世家作主憂臣勞主辱臣死。文選曹大家東征賦曰身

既歿而名存。左僖三十三年曰先軫免胄入狄師死焉狄人歸其元面如生杜注曰元首也。英華亂作狄。尙書八句叙羊侃善守不幸而死也梁書羊侃傳曰侃字祖忻泰山梁甫人太清二年爲都官尙書侯景至新林侃副宣城王都督城內諸軍事時景既卒至百姓競入公私混亂無復次第侃乃區分防擬皆以宗室閭之軍人爭入武庫自取器甲所司不能禁侃命斬數人方得止賊攻東掖門縱火甚盛侃親自距抗以水沃火火滅引弓射殺數人賊乃退賊爲尖頂木驢攻城矢石所不能制侃作雉尾炬施鐵鏃以油灌之擲驢上焚之俄盡賊又東西兩面起土山以臨城城中震駭侃命爲地道潛引其土山不能立賊又作登城樓車高十餘丈欲臨射城內侃曰車高塹虛彼來必倒可臥而觀之不勞設備及車動果倒衆皆服焉初侃長子鷲爲景所獲執來城下示侃侃謂曰我傾宗報主猶恨不足豈復計此一子幸汝早能殺之數日復持來侃謂鷲曰久以汝爲死猶復在邪因引弓射之賊感其忠義亦不之害也後大雨城內土山崩賊乘之垂入苦戰不能禁侃乃令多擲火爲火城以斷其路徐於裏築城賊不能進十二月遣疾卒于臺內時年五十四。孫子始計篇曰多算勝少算不勝。左昭二十三年沈尹戌曰完其守備以待不虞。墨子公輸篇曰公輸盤爲楚造雲梯之械成將以攻宋子墨

子聞之至於郢見公輸盤子墨子解帶爲城以牒爲械（御覽兵部引牒作襟是）公輸盤九設攻城之機變子墨子九距之（御覽引距作拒）公輸盤之攻械盡子墨子之守圉有餘（御覽引圉作禦）。後漢書光武帝紀曰或爲地道輜車撞城。齊將二句俟考張杏濱以齊將閉壁爲樂毅守即墨燕師臥牆爲樂毅宿兵城下謂喻羊侃善守幸而不死則景之兵亦不久頓城下矣上句似稍近而下句未合倪注實以燕慕容寶軍敗參合與疾過平城築燕昌城事亦不能合楊復吉曰燕師臥墻子山必有所本前注即指樂毅固非此注所引初無臥墻事尤不足爲據也。史記留侯世家良曰誰爲陛下畫此計者陛下事去矣晉書陶侃傳殷羨曰若遣救大業則大事去矣。詩瞻卬曰人之云亡邦國殄瘁。申子十句叙柳仲禮戰敗降賊也南史柳仲禮傳。（附柳元景傳元景河東解人仲禮曾伯祖）曰仲禮勇力兼人少有膽氣初侯景潛圖反曦仲禮先知之屢啓求以精兵三萬討景朝廷不許及景濟江朝野便望其至兼蓄雍司精卒與諸蕃赴援見推總督景素聞其名深憚之韋粲見攻仲禮方食投箸被練馳之騎能屬者七十比至粲已敗仲禮因與景戰于青塘大敗之景與仲禮交戰仲禮稍將及景而賊將支伯仁自後斫仲禮中肩馬陷於淖賊聚稍刺之騎將郭山石救之以免自此壯氣外衰

不復言戰神情傲恨淒蔑將帥常置酒高會日作優倡毒掠百姓污辱妃主父津登城謂曰汝君父在難不能盡心竭力百代之後謂汝爲何仲禮聞之言笑自若景嘗登朱雀樓與之語遺以金環是後閉營不戰及臺城陷仲禮召諸將軍會議裴之高王僧辯曰將軍擁衆百萬致宮闕淪沒正當悉力決戰何所多言仲禮竟無一言諸軍乃隨方各散仲禮開營降賊時城雖淪陷援軍甚衆軍士咸欲盡力及聞降莫不歎憤論者以爲梁禍始於朱异成於仲禮小名錄曰仲禮小字申子。文選西征賦曰何猛氣之咆勃李善注曰咆勃怒貌也。詩六月曰元戎十乘以先啓行毛傳曰元大也夏后氏曰鈎車先正也殷曰寅車先疾也周曰元戎先良也。晉書劉琨傳琨上表曰臣當首啓戎行身先士卒。左僖二十二年公及邾師戰于升陘我師敗績邾人獲公胄縣諸魚門杜注曰魚門邾城門。水經河水注曰荒干水又西南逕白道南谷口有城在右縈帶長城背山面澤謂之白道城自城北出有高阪謂之白道嶺沿路惟土穴出泉挹之不窮余每讀琴操見琴慎相和雅歌錄云飲馬長城窟及其跋陟斯途遠懷古事始知信矣非虛言也。史記高祖本紀索隱引三輔故事曰楚漢相距於京索間六年身被大創十二矢石通中過者有四。蜀志關羽傳曰羽嘗爲流矢所中貫其左臂後創雖愈每至陰雨骨

常疼痛醫曰矢鏃有毒入於骨當破臂作創刮骨去毒然後此患乃除耳羽便伸臂令醫劈之時羽適請諸將飲食相對臂血流離盈於盤器而羽割炙引酒言笑自若。魏志陳思王植傳植上疏求自試曰常恐先朝露填溝壑墳土未乾而身名並滅

或以隼翼鸚披。虎威狐假。霑漬鋒鏑。脂膏原野。兵弱虜強。城孤氣寡。聞鶴唳而心驚。聽胡笳而淚下。據神亭而亡戟。臨橫江而棄馬。崩於鉅鹿之沙。碎於長平之瓦。以上總敘

敗軍之狀

亢倉子君道篇曰今夫以隼翼而被之鸚視不明者正以為隼明者視之乃鸚也。楚策一江乙曰虎求百獸而食之得狐狐曰子無敢食我也天帝使我長百獸子以我為不信吾為子先行子隨我後視百獸之見我而敢不走乎虎以為然故遂與之行獸見之皆走虎不知獸畏已而走也以為畏狐也。漢書陳勝項籍傳贊銷鋒鏑注引如淳曰鏑音鏑箭鏃也顏曰鋒戈戟刃也。史記司馬相如傳喻巴蜀檄曰肝腦塗中原膏液潤野草。晉書載記苻堅傳曰堅與苻融登城而望王師見部陣齊整將士精銳又北望八公山上草木皆類人形顧謂融曰此亦

勦敵也何謂少乎列陣逼肥水融麾軍却陣軍遂奔退制之不可止融馬倒被殺軍遂大敗王師乘勝追擊堅爲流矢所中單騎遁還於淮北聞風聲鶴唳皆謂晉師之至。周書心作虛。晉書劉琨傳曰現在晉陽嘗爲胡騎所圍數重城中窘迫無計琨乃乘月登樓清嘯賊聞之皆悽然長歎中夜奏胡笳賊又流涕歔歔有懷土之切向曉復吹之賊並棄圍而走。吳志太史慈傳曰孫策至劉繇使慈偵視輕重時獨與一騎卒遇策策從騎十三皆韓當宋謙黃蓋輩也慈便前鬪正與策對策刺慈馬而挈得慈項上手戟慈亦得策兜鍪會兩家兵騎並各來赴於是解散慈與繇俱奔豫章又曰慈見囚執策即解縛捉其手曰寧識神亭時耶裴松之注曰英歷云慈於神亭戰敗爲策所得與本傳大異疑爲謬誤。吳志孫討逆傳注引江表傳曰策說袁術云家有舊恩在東願助舅（吳景）討橫江術許之策渡江攻繇牛渚營盡得邸閣糧穀戰具時下邳相笮融依繇爲盟主策攻融爲流矢所中傷股不能乘馬因自輿還牛渚營。春秋僖十四年沙鹿崩杜預注曰沙鹿山名陽平元城縣東有沙鹿土山史記項羽本紀曰項羽乃遣當陽君蒲將軍將卒二萬渡河救鉅鹿戰少利陳餘復請兵項羽乃悉引兵渡河皆沈船破釜甑廬舍持三日糧以示士卒必死無一還心於是至則圍王離與秦軍遇九戰絕其甬道

大破之漢書地理志鉅鹿縣屬鉅鹿郡案沙鹿山在今河北大名縣東鉅鹿城今河北平鄉縣治相去甚遠此言鉅鹿秦兵之敗如沙鹿之崩合二事為一事也。史記廉頗藺相如傳曰秦伐韓軍于闕與王乃令趙奢將兵救之秦軍軍武安西鼓譟勒兵武安屋瓦盡振又曰後四年趙惠文王卒子孝成王立七年（梁玉繩校當作八）秦與趙兵相距長平趙王以趙括為將秦軍射殺趙括案武安舊注徐廣以為屬魏郡在邯鄲西非也楊守敬謂闕與在今山西和順榆社之間於漢晉時屬涅縣於趙時屬武安故傳言軍武安西隋志謂在隋之武安（今河南武安縣）非是史遷武安之文所包甚廣不得於隋唐之武安求之其說是也長平在今山西高平縣西而秦軍武安西在趙惠文王時秦破趙軍長平在趙孝成王時此亦合二事為一事也

於是桂林顛覆長洲糜鹿潰潰沸騰茫茫慘黷天地離阻神人怨酷晉鄭靡依魯衛不睦競動天關爭迴地軸探雀殼而未飽待熊蹯而詎熟乃有車側郭門箭懸廟屋鬼同曹社之謀人有秦庭之哭

以上鉅臺城陷武帝死而已出奔江陵也

文選吳都賦曰數軍實乎桂林之苑劉淵林注曰吳有桂林苑在建鄴東北十里太平寰宇記曰江南道昇州上元縣桂林苑在縣北四十里落星山之陽吳立。文選枚叔上書重諫吳王長洲之苑李善注引服虔曰吳苑也又引韋昭曰長洲在吳東困學紀聞（卷十）曰吳下滬都廣陵漢郡國志廣陵郡東陽縣有長洲澤吳王濞太倉在此（續漢書郡國志）東陽今盱眙縣自注曰元和郡縣志苑在長洲縣西南七十里未足據也當從郡國志闕若璩曰漢王莽傳臨淮瓜田儀等爲盜賊依阻會稽長洲此則與元和志所云長洲苑同指在蘇洲者而言非東陽也萬希槐集證曰太平御覽八百三十一引吳地記曰長洲在姑蘇南太湖北岸闔廬所遊獵處也吳王遣徐詳至魏魏太祖謂詳曰孤比老願濟橫江之津與孫將軍遊姑蘇之上獵長洲之苑吾志足矣按此指在蘇者言步瀛案吳都賦佩長洲之茂苑在造姑蘇之高臺句後或亦指在姑蘇者而言此賦則借喻金陵當不泥何地然與麋鹿連文亦似指姑蘇長洲言史記淮南王傳伍被曰臣聞子胥諫吳王吳王不用乃曰臣今見麋鹿游姑蘇之臺也。詩召旻曰潰潰回適毛傳曰潰潰亂也十月之交曰百川沸騰。慘黷見思舊銘風雲上慘句注英華慘作慘。英華怨作慘。左隱六年周桓公言於王曰我周之東遷晉鄭焉依又定六年公叔文子

老矣輦而如公曰太姒之子唯周公康叔爲相睦也倪曰晉鄭二句謂臺城陷後諸王不急討賊自相猜忌也按南史侯景傳時荊州刺史湘東王繹師於武城河東王譽次巴陵前信州刺史桂陽王憺頓江津并未之進是靡依也又按河東王譽傳（附梁武帝諸子昭明太子統傳後）云元帝軍于武城新除雍州刺史張縝密報元帝曰河東起兵岳陽聚米將襲江陵元帝甚懼沈米斷纜而歸遣世子方等征之反爲譽敗死又令信州刺史鮑泉討譽譽逆擊不利而還泉進軍橘洲譽攻之又見敗於是遂圍之帝又遣領軍王僧辯代鮑泉攻譽譽被執遂斬首送荊鎮又邵陵王綸傳云于時元帝圍河東王譽於長沙既久譽請救於綸綸欲往救之爲軍糧不繼遂止乃與元帝書曰卽日大敵猶彊天讐未雪余爾昆弟在外三人如不匡救安用臣子如使逆寇未除家禍仍構料今訪古未或弗亡侯景之軍所以未窺江外政爲藩屏盤固宗鎮疆密若自相魚肉是謂代景行師醜徒聞此何快如之元帝復書陳譽有罪不可解圍之狀綸省書流涕曰天下之事一至於斯於是大修器甲將討侯景元帝聞其盛乃遣王僧辯帥舟師一萬以逼綸綸將劉龍武等降僧辯綸走武昌又周書蕭瑒傳（倪引作梁王瑒傳與周書不合今改餘皆仿此不悉注）曰會梁元帝與譽及信州刺史桂陽王憺人授金陵屬侯景已

請和梁武帝詔罷援軍譽自江口將旋湘鎮懽欲待梁元帝至謁督府方還州張纘貽梁元帝書曰河東欲襲江陵岳陽在雍共謀不逞江陵遊軍主朱榮又遣使報云桂陽住此欲應譽譽梁元帝信之歸至江陵收懽殺之令其子方等王僧辯等相繼攻譽於湘州譽又告急於晉晉聞之大怒率衆二萬騎四千匹伐江陵攻柵不克退而築城又盡銳攻之會大雨暴至平地水四尺晉夜遁歸襄陽又南史鄱陽王範傳曰範軍於嶷陽遣信告尋陽王大心大心要還九江欲共兵西上範乃引車至盆城以晉熙爲晉州遣子嗣爲刺史江州郡縣輒更改易於是尋陽政令所行唯在一郡又疑畏範市糴不通範乃復遣其弟觀寧侯永將兵通南川助莊鐵時二鎮相猜無復圖賊之志其不睦如此晉鄭魯衛皆周室姬姓以喻梁朝宗室所以深責諸王也。史記天官書曰黑帝行德天關爲之動。地軸見賀平鄴都表注。史記趙世家曰公子成李兌謀遂圍主父令宮中人後出者夷宮中人悉出主父欲出不得又不得食探爵穀而食之三月餘而餓死沙丘集解引綦母邃曰斂爵子也。左文元年曰楚太子商臣以宮甲圍成王王請食熊蹯而死弗聽王緄杜注曰熊掌難熟冀久將有外救南史梁武帝紀曰帝疾久口苦索蜜不得再曰荷荷遂崩。左襄二十五年曰崔氏側莊公于北郭丁亥葬諸士孫之里四鬲

不蹕下車七乘不以兵甲杜注曰側薨埋之不殯於廟下車送葬之車齊舊依上公禮九乘又有兵甲今皆降損。楚策四客說春申君曰淖齒用齊擢閔王之筋縣於其廟梁宿昔而死又見韓子姦劫弑臣篇而呂氏春秋正名篇行論篇高注廟梁作東廟。左哀七年曰初曹人或夢衆君子立于社宮而謀亡曹杜注曰社宮社也。秦庭見序徐炯曰上句總結建康之亡下句伏已奔江陵之意案此秦庭喻江陵與序中秦庭異或以此爲信自赴秦非也

余乃假刻璽於關塞稱使者之酬對逢鄂坂之譏嫌值郾門之征稅乘白馬而不前策青驪而轉礙吹落葉之扁舟飄長風於上游彼鋸牙而鉤爪又循江而習流排青龍之戰艦闢飛鸞之船樓張遼臨於赤壁王濬下於巴邱乍風驚而射火或箭重而回舟未辨聲於黃蓋已先沈於杜侯落帆黃鶴之浦藏船鸚鵡之洲路已分於湘漢星猶看於斗牛

以上敘自金陵赴江陵

英華余作爾。史記酷吏傳曰寧成抵罪髡鉗自以爲不復收於是解脫詐刻傳出關歸家。

史記春申君傳曰楚太子因變衣服爲楚使者御以出關。周書酬作訓字通。晉書惠帝紀曰永寧元年春正月趙王倫篡帝位三月齊王冏起兵討倫倫遣其將張泓孫輔出壻坂以距冏清統志曰河南府鄂坂關在登封縣東南峽鄂壻同此鄂坂乃借以爲喻與下砭門同陸繁詔謂與轅轅相近疑用左傳欒盈出奔事雷琳疑自建康奔江陵不經河南之鄂坂以爲是鄂渚之坂倪又以昭關吏欲執伍昌事當之皆近傳會。左又十一年曰宋武公之世鄭瞞伐宋司徒皇父帥師禦之耐班御皇父充石以敗狄于長丘獲長狄緣斯宋公於是以門賞耐班使食其征謂之砭門杜注曰門關門征税也。白孔六帖九引桓譚新論曰公孫龍常爭論曰白馬非馬人不能屈後乘白馬無符傳欲出關關吏不聽此虛言難以奪實也。御覽獸部引魯女生別傳曰李少君死後百餘日後人有見少君在河東蒲坂乘青驢帝聞之發棺無所有。白孔六帖十一曰古者觀落葉因以爲舟徐炯曰此信自序舍陸從舟沿江而上也。吳都賦曰習御長風。周書風作颿。吳都賦曰鉤爪鋸牙自成鋒穎劉淵林注引淮南子曰勾爪鋸牙於是擊矣案今淮南本經篇鋸作居王炯曰此下序途中遇侯景襲郢之兵也步瀛案事見徐孝穆與王僧辯書注。史記西南夷傳曰莊蹻將兵循江上越王勾殘世家曰乃發習流二

千人。周書循作巡。述異記曰吳王夫差作天池池中造青龍舟吳曰南史土僧辯傳湘州賊陸納造青龍舊有此名不自納始故賦引之。吳曰晉令水戰有飛燕船步瀛案見初學記御覽舟部引然皆作飛鳥船不作飛燕也周嬰扈林五曰南齊荀伯玉傳世祖在東宮任左右張景真世祖拜陵荀伯玉密白之上大怒檢校東宮世祖還至方山日暮將泊豫章王乘飛鸞東迎具白上怒之意宋書袁顛傳劉胡叛走袁顛大怒呼取飛鸞謂衆曰我當自出追之至鵠頭步取青林予謂此雙燕皆船名也哀江南賦闕飛燕之船樓可據梁元帝詩飛燕動飛橈與子山賦正同。魏志張遼傳曰太祖既征孫權還使遼與樂進李典將七千餘人屯合肥權率十萬衆圍合肥遼披甲持戟先登陷陣殺數十人斬二將權人馬皆披靡無敢當者還修守備權守合肥十餘日城不可拔乃引退遂率諸軍追擊幾獲權赤壁見吳明徹墓誌銘注倪曰張遼本臨合肥而云赤壁者疑誤步瀛案子山或有所本今不可攷。晉書王濬傳曰太康元年正月濬發自成都率巴東監軍廣武將軍唐彬攻吳丹陽尅之吳人於江險磧要害之處並以鐵鑼橫截之又作鐵錐長丈餘暗置江中以逆距船濬乃作大筏數十亦方百餘步縛草爲人被甲持杖令善水者以筏先行筏遇鐵錐錐輒著筏去又作火炬長十餘丈大數十圍灌以麻

油在船前遇燂然炬燒之須臾融液斷絕於是船無所礙又溶上書曰臣自達巴邱所向風靡
倪曰張遼王濬喻王僧辯胡僧祐等也。風火卽周瑜赤壁之戰見吳明徹墓誌銘注。吳志
吳主傳注引魏略曰權乘大船來觀軍公使弓弩亂發箭著其船船偏重將覆權因迴船復以
一面受箭箭均船平乃還案梁書王僧辯傳曰賊復攻巴陵城上放木擲火礮礮石殺傷甚多
賊又於艦上立木桔槔聚茅置火以燒水柵風勢不利自焚而退旣頻戰挫餓賊帥任約又爲
陸法和所擒景乃燒營夜遁旋軍夏首。吳志黃蓋傳注引吳書曰赤壁之役蓋爲流矢所中
時天寒墮水爲吳軍人所得不知其蓋也置厠牀中蓋自強以一聲呼韓當當聞之曰此公覆
聲也向之垂涕解易其衣遂以得生。魏志杜畿傳曰文帝卽王位賜爵關內侯及踐阼進封
豐樂亭侯帝幸許昌畿居守受詔作御樓船於陶河試船遇風沒帝爲之流涕諡曰戴侯吳曰
北史藝術傳陸法和征約至赤沙湖遂縱火船而逆風不便法和執白羽扇揮風風卽返約逃
竄不知所之法和曰吾前於此洲建一刹語檀越實平賊標今何不向標下求賊也果於水見
約抱刹仰頭裁出鼻遂擒之倪曰南史王僧辯傳云景歸鄴賊帥宋子仙等困蹙求輸郢城身
還就景僧辯僞許之子仙謂爲信然浮舟將發僧辯命杜龔鼓噪掩至大破之擒子仙丁和等

送江陵鄂州平。落帆四句王炯曰此信自序乘間得度鄂州而猶懷思故都也。水經江水注曰江之右岸有船官浦歷黃鵠磯西而南矣直鸚鵡洲之下尾江水澆洄淤浦是曰黃軍浦昔吳將黃蓋軍師所屯故浦得其名船官浦東即黃鵠山林澗甚美山下謂之黃鵠岸岸下有灣目之爲黃鵠灣元和郡縣志汀南道鄂州江夏縣黃鵠山在縣東九里（鶴鶴字通）鸚鵡洲在縣西南二里案江夏縣卽今湖北武昌縣陸繁詔曰落帆藏船避禍也通鑑大寶二年四月任約破鄂州六月王僧辯復鄂州七月湘東王以長沙王詔監鄂州事而詔傳云詔爲鄂州信西上江陵塗經江夏詔接信甚薄則知信奔還時正值用兵之際無疑。漢書地理志零陵郡零陵縣（今廣西全縣西南）原注曰陽海山（在今廣西興安縣南九十里）湘水所出北至鄢（王先謙曰鄢當爲下雋二字之誤）入江過郡二（零陵長沙）行二千五百三十里水經湘水篇曰北過下雋縣西微水從東來流注之鄢注曰湘水左會清水口資水也世謂之益陽江湘水左則沅水注之謂之橫房口右屬微水湘水左則澧水注之世謂之武陵江凡此四水同注洞庭北會大江。書禹貢曰蟠冢導漾東流爲漢漢書地理志隴西郡西縣（今甘肅天水縣西南）原注曰禹貢蟠冢山西漢（常有水字）所出南入（王先謙曰入當作會）廣

漢白水至江州（今四川巴縣西）入江氏道縣（今甘肅清水縣西南）原注曰禹貢養水所出（王念孫曰說文漾古文作潏志作養假借字又謂至武都爲漢至上脫東字）至武都爲漢武都郡武都縣（今甘肅成縣西）原注曰東漢水受氏道水（王念孫曰東字後人所加）一名沔過江夏謂之夏水入江又沮縣（今陝西略陽縣東）原注曰沮水出東狼谷南至沙羨南入江過郡五（王先謙曰武都漢中南陽南郡江夏）行四千里荊州川金榜禮箋曰嶓冢道潏惟據禹貢漢水言耳周官職方荊州漢水則不導源於嶓冢故志云沮水出沮縣東狼谷云云說文（水部）水經（沮水篇）後漢郡國志（荊州）皆云然蓋潏水輟流不與漢水相屬由來久矣志言禹貢養水云云此明禹貢漢水故道非謂漢代東漢水仍上受氏道水也後儒考漢志不詳于漢源求嶓冢不得因傍漢水之山強名之爲嶓冢亦近誣矣（此指今陝西寧羌縣北之嶓冢言始於魏書地形志非古也）漢志禹貢嶓冢山在隴西西縣西漢水所出不見於氏道然於氏道言禹貢養水所出東至武都爲漢正釋經嶓冢道潏東流爲漢明氏道亦得有嶓冢山是山峰岫延長西氏道皆其盤迴之地準之地望當在西縣東志已于西縣著嶓冢氏道例不重出水經言潏水出隴西氏道縣嶓冢山（漾水篇）郭景純山海經注

(西山經)亦言蟠冢在武都氏道縣南可與漢志互明陸繁弼曰湘水由洞庭湖至岳州府
 (今湖南岳陽縣)北合大江岳州在梁為巴州漢水至漢陽府(今湖北漢陽縣)東大別
 山北合大江所謂沔口也沔口之東即武昌府城(今湖北武昌縣)在梁為郢州信由建康
 奔還當自郢而巴而江陵也。爾雅釋大曰星紀斗牽牛也漢書地理志曰吳地斗分壘也粵
 地牽牛婺女之分壘也律歷志曰星紀初斗十二度終於婺女七度續漢書律歷志注引蔡邕
 月令章句曰自斗六度至須女二度謂之星紀之次越之分野郡國志注又引皇甫謐帝王世
 紀曰自斗十一度至婺女七度一名須女曰星紀之次今吳越分野又互見徐孝穆與楊僕射
 書注陸繁弼曰此信自言將入江陵而心猶存故都也

若乃陰陵失路。鈞臺斜趣。望赤岸而沾衣。鱣烏江而不渡。雷池柵浦。鵲陵焚戍。旅舍
 無烟。巢禽失樹。謂荆衡之杞梓。庶江漢之可恃。淮海維揚。三千餘里。過漂渚而寄食。
 託蘆中而渡水。屆於七澤。濱於十死。嗟天保之未定。見殷憂之方始。本不達於危行。
 又無情於祿仕。謬掌衛於中軍。濫尸丞於御史。
見以上述途中飄泊之狀及復用於元帝而憂其不終

史記項羽本紀曰項王至陰陵迷失道問一田父田父紿曰左左乃陷大澤中集解引徐廣曰陰陵在淮南正義引括地志曰陰陵縣故城在濠州定遠縣西北六十里地理志云陰陵縣屬九江郡清統志曰安徽鳳陽府陰陵故城在定遠縣西北案陰陵非子山往江陵所經此借項羽失路爲喻耳。英華失路作路絕注曰絕一作失。鈞臺見上又水經江水注曰江之右岸有鄂縣故城今武昌郡治城南有袁山即樊山也北背大江江上有鈞臺孫權常極飲其上清統志曰湖北武昌府鈞臺在武昌縣西南江濱蜀志先主傳曰先主斜趣漢津案鈞臺在武昌子山欲赴江陵故借言所往也。文選七發曰凌赤岸李善注引山謙之南徐州記曰京江禹貢北江春秋分朔輒有大濤至江乘北激赤岸尤更迅猛清統志曰江蘇江寧府赤岸山在六合縣東南四十里。集赤岸作赤壁此依周書。鱧烏江見擬連珠注項羽本紀正義引括地志曰烏江亭即和州烏江縣是也晉初爲縣水經注云水又北得黃律口漢書所謂烏江亭長艤船以待項羽即此也(沔水注)清統志曰安徽和州(今改縣)烏江浦在州東北四十里土多黑壤故名案赤岸烏江殆皆所經之路。雷池見鮑明遠登大雷岸與妹書注又文選江賦曰其旁則有雲夢雷池李善注引吳錄曰雷池在皖。左傳昭五年曰楚伐吳吳人敗諸鵠岸

杜注曰廬江舒縣有鵠尾渚春秋傳說彙纂曰今太平府繁昌縣（今屬安徽）西南大江中有鵠洲蓋自銅陵鵠頭山至三山爲鵠尾故江曰鵠江岸曰鵠岸清統志曰安徽池州府鵠頭山在銅陵縣北十里倪曰自陰陵以下當謂侯景巴陵失律江郢喪師還奔建康所經之路築柵焚戍也南史侯景傳云都下戶口百無一二大航南岸極目無煙又云於是千里絕煙人跡罕見白骨成聚如丘壠焉步瀛案雷池四句蓋追敘途中所見耳張尙瑗舉陳霸先與王僧辯軍次大雷及侯瑱襲克南陵鵠頭等戍但以地勢偶合而傳會之倪又謂巢禽無樹謂諸王之敗皆不足倚亦嫌穿鑿。英華失樹作無樹此依周書。書禹貢曰荆及衡陽惟荊州左傳襄二十六年聲子曰如杞梓皮革自楚往也又哀六年楚昭王曰江漢雖章楚之望也倪曰謂元帝可恃以靖亂也。書禹貢曰淮海維揚州王洄曰自金陵遡江而上江陵約三千餘里。史記淮陰侯傳曰信釣於城下諸母漂有一母見信飢飯信竟漂數十日集解引韋昭曰以水擊絮爲漂故曰漂母正義曰淮陰城北臨淮水清統志曰江蘇淮安府韓侯釣臺在山陽縣北與漂母祠爲鄰。吳越春秋卷三曰伍員至江中有漁父乘船從下方泝水而上子胥呼之謂曰漁父渡我既渡漁父視其有飢色乃謂曰子侯我此樹下爲子取餉漁父去後子胥疑之乃潛

於身深葦之中有頃父來持麥飯鮑魚羹盎漿求之樹下不見因歌而呼之曰蘆中人蘆中人豈非窮士乎。司馬長卿子虛賦曰楚有七澤。齊語桓公曰是以濱于死賈誼新書諸侯篇曰十死一生。詩小雅曰天保定爾史記周本紀曰武王至于周自夜不寐周公即王所曰曷爲不寐王曰我未定天保何暇寐。文選劉越石勸進表曰或殷憂以啓聖明李善注引韓詩曰耿耿不寐如有殷憂。論語憲問篇子曰邦有道危言危行邦無道危行言孫。詩君子陽陽序曰君子遭亂相招爲祿仕全身遠害而已晉書王衍傳曰衍自言少無宦情。周書信傳曰信奔于江陵梁元帝承制除御史中丞及即位轉右衛將軍唐六典（卷二十四）曰秦漢始置衛將軍後漢及魏並因之晉文帝置臺又置中衛軍將軍武帝受命分爲左右二衛宋齊因之梁左右衛將軍班第十二又（卷十三）曰漢百官表御史大夫有兩丞一曰中丞梁制十八班中丞班第十一。英華濫作誤注曰一作濫

信·生·世·等·於·龍·門·辭·親·同·於·河·洛·奉·立·身·之·遺·訓·受·成·書·之·顧·託·昔·三·世·而·無·慙·今·七·葉·而·始·落·泣·風·雨·於·梁·山·惟·枯·魚·之·銜·索·入·欵·斜·之·小·徑·掩·蓬·藿·之·荒·扉·就·汀·洲·

之杜若待蘆葦之單衣。

以上悼父之先亡憂君之猜忌不勝身世之感

史記太史公自序曰談爲太史公有子曰遷遷生龍門仕爲郎中奉使西征巴蜀以南南略邛笮昆明還報命而太史公留滯周南且卒而子遷適使反見父於河洛之間太史公執遷手而泣曰余死汝必爲太史爲太史無忘吾所欲論著矣且夫孝始於事親中於事君終於立身揚名於後世以顯父母此孝之大者余爲太史而弗論載廢天下之史文余甚懼焉汝其念哉遷俯首流涕曰小子不敏請悉論先人所次舊聞弗敢闕集解引徐廣曰龍門在馮翊夏縣摯虞曰古之周南今之洛陽正義引括地志曰龍門在同州韓城縣北五十里龍門山在夏陽縣遷即漢夏陽縣人也至唐改故曰韓城縣。三世謂其先道驥易肩吾也博物志六曰太丘長陳寔子鴻臚卿紀子司空羣羣子泰四世於漢魏今朝有重名而其德漸小時人爲其語曰公慙卿卿慙長。左太冲詠史詩曰金張籍舊業七葉珥漢貂案元和姓纂滔少子璋（此字未知有誤否）晉永安太守立孫易南齊司徒主簿生黔婁辱陵令肩吾梁度支尙書生衡信譚揆南齊書高逸傳曰庾易祖玳巴郡太守父道驥安西參軍梁書孝行傳曰庾黔婁父易文學傳曰庾於陵黔婁之弟也弟肩吾據此則滔子璋璋子某（無聞）某子玳玳子道驥道驥子易

子肩吾肩吾子信故下敷至信爲七葉也。英華始作方。梁山見徐孝穆與王僧辯書曾耕
雨雪注。韓詩外傳一曰枯魚銜索幾何不蠹二親之壽忽如過隙。吳曰張衡應閒曰捷徑
邪至吾不忍以投步沈約郊居賦曰入蓬蘽之荒茫。楚辭九歌湘君曰搴汀洲兮杜若。吳
志諸葛恪傳曰先是童謠曰諸葛恪蕭葦單衣箴鈎落於何相求成子閣成子閣者反語石子
岡也建業南有長陵名曰石子岡葬者依焉鈎落者校飾革帶世謂之鈎絡帶恪果以葦席裹
其身而箴束其腰投之於此岡倪曰時元帝猜忌信憂讒待死若屈原葛恪矣

於。時。西。楚。霸。王。劍。及。繁。陽。慶。兵。金。匱。校。戰。玉。堂。蒼。鷹。赤。雀。鐵。舳。牙。檣。沈。白。馬。而。誓。衆。
負。黃。龍。而。渡。江。海。潮。迎。艦。江。萍。送。王。戎。車。屯。於。石。城。戈。船。掩。乎。淮。泗。諸。侯。則。鄭。伯。前。
驅。盟。主。則。荀。營。暮。至。剖。巢。熏。穴。奔。魍。走。魅。埋。長。狄。於。駒。門。斬。蚩。尤。於。中。冀。然。腹。爲。燈。
飲。頭。爲。器。直。虹。貫。壘。長。星。屬。地。昔。之。虎。踞。龍。蟠。加。以。黃。旗。紫。氣。莫。不。隨。狐。兔。而。窟。穴。
與。風。塵。而。殄。瘁。西。瞻。博。望。北。臨。玄。圃。月。榭。風。臺。池。平。樹。古。倚。弓。於。玉。女。窗。扉。繫。馬。於。

鳳皇樓柱仁壽之鏡徒懸茂陵之書空聚

以上元帝使王僧辯陳霸先滅侯景而故都終不可復

梁書元帝紀曰大寶三年世祖猶稱太清六年二月王僧辯衆軍發自尋陽世祖馳檄告四方三月王僧辯等平侯景傳其首於江陵。史記項羽本紀曰項王自立爲西楚霸王王九郡都彭城徐樹穀曰時元帝都江陵楚地且未正位號故以西楚霸王爲比倪說同案二說是也或以爲元帝未親出霸王指陳霸先非也此但就命將而言耳。左宣十四年曰楚子聞之投袂而起綑及於寢門之外又襄四年曰楚師爲陳叛故猶在繁陽杜注曰繁陽楚地在汝南編陽縣南清統志曰河南汝寧府繁陽亭在新蔡縣北陸繁弼曰劍及繁陽謂元帝分遣諸將至此也彙注引浦起龍曰言奮厲命帥狀。漢書霍去病傳合短兵麀臯蘭下隋書經籍志子部兵家有太公金匱二卷。三輔黃圖曰未央宮有玉堂殿案此句當別有出典俟攷。白孔六帖十一舟部載蒼鷹赤雀鐵軸牙檣註曰皆戰船名案蒼鷹赤雀爲戰船名鐵軸牙檣言戰船之飾非船名也初學記器物部引晉令曰水戰有蒼隼船又引王隱晉書曰陶侃擊蜀賊王眞眞拘得侃青雀舟蒼鷹赤雀類此方言九曰船後曰軸制水也郭注曰今江東呼檣爲軸樂府詩集卷二十五淡黃思歌辭曰象牙作帆檣文選江賦注引埤蒼曰檣帆柱也。晉書郝鑒傳

曰祖約蘇峻反鑿設壇場刑白馬大誓三軍。呂氏春秋知分篇曰禹南省方濟乎江黃龍負舟又見淮南子精神篇梁書王僧辯傳曰陳霸先帥衆五萬出自南江前軍五千行至濫口與僧辯會于白茅洲登壇盟誓霸先爲其文於是升壇歃血共讀盟文皆淚下寤襟辭色慷慨南史僧辯傳曰及發鵠頭江中有羣魚躍水飛空引導賊望見官軍有五色雲雙龍夾艦行甚迅疾。周書渡江作度湘。左太冲吳都賦曰迎潮水而振縉。說苑辨物篇曰楚昭王渡江有物大如斗直觸王舟止於舟中昭王大怪之使聘問孔子孔子曰此名萍實令剖而食之惟霸者能獲之此吉祥也又見家語致思篇。文選吳都賦曰戎車盈於石城戈船掩乎江湖劉淵林注曰石城石頭塢也在建業西臨江其中有庫藏軍儲戈船船下有戈也李善注曰吳紀曰建安十七年城石頭越絕書伍子胥船有戈元和郡縣志江南道潤州上元縣石頭城在縣西四里即楚之金陵城也吳改爲石頭城案梁書王僧辯傳曰王師次于南洲賊帥侯子鑒等率步騎萬餘人於岸挑戰衆軍鼓噪大呼合戰中江賊悉赴水僧辯即督諸軍沿流而下進軍于石頭之斗城作連營以逼賊。英華掩乎作掩于。左昭四年曰夏諸侯如楚鄭伯先待于申六月丙午楚子合諸侯于申。詩伯兮曰爲王前驅。左襄十一年曰四月諸侯伐鄭己亥齊

太子光宋向戌先至于鄭門于東門其莫晉荀營至于西郊東侵舊許。吳都賦曰顛覆巢居剖破窟宅。左文十八年以禦螭魅杜注曰螭魅山林異氣所生爲人害者陳書高祖本紀曰景率衆萬餘人鐵騎八百餘匹結陣而進高祖曰今我師旣衆賊徒甚寡應分賊兵勢乃命諸將分處置兵賊直衝王僧志僧志小縮高祖遣徐度領弩手二千橫截其後賊乃却高祖與王琳杜龔等以鐵騎悉力乘之賊退據其柵景儀同盧暉略開石頭北門來降衆軍又尅其四城高祖親率攻之士卒騰柵而入賊復散走景衆大潰逐北至西明門景至闕下不敢入臺遣腹心取其二子而遁。左文十一年曰鄭瞞侵齊遂伐我公使叔孫得臣追之冬十月甲午敗狄于鹹獲長狄僑如富父終甥椿其喉以戈殺之埋其首於子駒之門杜注曰鄭瞞狄國名防風之後漆姓僑如鄭瞞國之君子駒魯郭門。周書嘗麥篇曰蚩尤乃逐帝爭于涿鹿之阿九隅無遺赤帝大懼乃說于黃帝執蚩尤殺之于中冀史記五帝本紀曰黃帝乃徵師諸侯與蚩尤戰于涿鹿之野遂禽殺蚩尤索隱引皇甫謐帝王世紀曰黃帝使應龍殺蚩尤於凶黎之谷或曰黃帝斬蚩尤於中冀因名其地曰絕轡之野又互見徐孝穆與楊僕射書注。燃腹爲燈見徐孝穆與王僧辯書瀾鳩元兇注。趙策曰趙襄子最怨知伯而將其頭以爲飲器史記刺客

傳作漆其頭以爲飲器大宛列傳曰匈奴破月氏王以其頭爲飲器案侯景被殺事亦見徐孝穆書注。御覽天部十四引黃帝占軍訣曰攻城有虹從南方入飲城中者從虹攻之勝白虹繞城不匝從虹所在擊之勝謹守其缺賊乃從其地破走。魏志公孫淵傳曰景初二年遣太尉司馬宣王征淵六月軍至遼東八月丙寅夜大流星長數十丈從首山東北墜襄平城東南壬午淵衆潰與其子修將數百騎突圍東南走大兵急擊之當流星所墜斬淵父子。御覽州郡部一引吳錄曰劉備曾使諸葛亮至京因覩秣陵山阜歎曰鍾山龍盤石頭虎踞此帝王之宅。周書踞作據。文選石闕銘注引司馬德操與劉恭嗣書曰黃旗紫氣恆見東南終成天下者揚州之君子又見鮑明遠河清頌注。潘安仁西征賦曰狐兔窟穴於殿傍。詩瞻卬曰邦國殄瘁梁書王僧辯傳曰景之退也僧辯令衆將入據臺城其夜軍人採柁失火燒大極殿及東西堂等時軍人鹵掠京邑剝剔士庶民爲其執縛者衽衣不免盡驅逼居民以求購贖自石頭至于東城緣淮號叫之聲震響京邑於是百姓夫望。英華瘁作悴。博望玄圃並見昭明太子荅湘東王求文集詩苑書注。沈休文郊居賦曰風臺累翼月榭重栴。說苑善說篇雍門子周曰高臺旣以壞曲池旣以漸。文選王文考魯靈光殿賦曰玉女闌窗而下視林茂

春文選補註曰：古人窗間多刻飾玉女庾子山賦云云。李白賦玉女攀星於網戶（明堂賦）。

李玉溪詩寒氣先侵玉女扉（雪詩）是也。御覽居處部四引晉宮閣名曰洛陽有鳳皇樓。

。北堂書鈔卷一百三十六引陸機與弟雲書曰：仁壽殿前有大方銅鏡，高可五尺餘，廣三尺二寸，立著庭中，向之便寫人形體，了了亦怪事也。漢書武帝紀曰：葬茂陵，太平廣記卷二引漢武內傳曰：帝崩時遺詔以雜經三十餘卷常讀玩之，使隨身斂到元康二年（元舊誤建今改）河東功曹李友入上黨抱犢山采藥於巖室中，得此經，盛以金箱，卷後題東觀臣姓名，記日月武帝時也。河東太守張純以經箱奏進，帝問武帝時左右侍臣有典書中郎，冉登見經及箱流涕對曰：此孝武皇帝殯殮時物也。臣當時以著梓宮中，不知何緣得出。宣帝大愴然，驚愕以經付孝武廟中。倪曰：漢武好道，梁武佞佛，故用此語蓋傷之也。

若夫立德立言，謨明寅亮，聲超於繫表，道高於河上，既不遇於浮邱，遂無言於師曠。

以愛子而託人，知西陵而誰望，非無北闕之兵，猶有雲臺之仗。

以上弔而文帝

左襄二十四年穆叔曰：豹聞之，太上有立德，其次有立功，其次有立言，雖久不廢，此之謂不朽。

。書皋陶謨曰謨明弼諧僞古文周官曰寅亮天地。周書寅作夤說文曰夤敬惕也經典多以寅爲之（朱駿聲以夤爲寅之別體字）。魏志荀彧傳注引何劭荀彧別傳曰彧兄悞難曰易亦云聖人立象以盡意繫辭焉以盡言則微言胡爲不可得而聞見哉彧答曰蓋理之微者非物象之所舉也今稱立象以盡意此非通於意外者也繫辭焉以盡言此非言乎繫表者也斯則象外之意繫表之言固蘊而不出矣（此條舊註引世說實無此文吾友孫蜀丞嘗正其誤）。神仙傳曰河上公者莫知其姓字漢文帝時公結草爲庵於河之濱帝讀老子經頗好之聞時皆稱河上公解老經義旨乃使齋所不決之事以問公曰道尊德貴非可遙問也帝即幸其庵躬問之隋書經籍志子部道家有老子道德經二卷漢文帝時河上公注梁書簡文帝紀曰讀書十行俱下九流百氏經目必記篇章辭賦操筆立成博綜儒書善言立理自年十一便能親庶務歷試蕃政所在有稱及居監撫多所引宥文案簿領纖毫不可欺引納文學之士賞接無倦恆討論篇籍繼以文章高祖所製五經講疏嘗於立圃奉述聽者傾朝野雅好韻詩其序云余七歲有詩癖長而不倦所著昭明太子傳五卷諸王傳三十卷禮大義二十卷老子義二十卷莊子義二十卷長春義記一百卷法寶連璧三百卷並行於世焉南史簡文帝紀又有

謝客文涇渭三卷玉簡五十卷光明符十二卷易林十七卷竈經二卷沐浴經三卷馬槩譜一卷棊品五卷彈棊譜一卷新增白澤圖五卷如意方十卷文集一百卷梁書何敬容傳曰太宗頻於玄圃自講老莊二書。浮邱見昭明太子荅湘東王書注。英華既作更。周書太子晉篇曰師曠見太子王子曰吾聞汝知人年之長短告吾師曠對曰汝聲清汗汝色赤白火色不壽王子曰然吾後三年將上賓於帝所汝慎無言殃將及汝師曠歸未及三年告死者至。陸士衡弔魏武帝文曰持姬女而指季約以示四子曰以累汝因泣下傷哉曩以天下自任今以愛子託人西陵見思舊銘注通鑑梁紀曰太清三年上所求多不遂志憂憤成疾太子以幼子大圓屬湘東王繹并剪爪髮以寄之南史梁簡文諸子傳曰樂良王大圓簡文第二十子也周書蕭大圓傳曰于謹軍至元帝乃令大封充使（南史梁簡文諸子傳曰汝南王大封簡文第九子也）請和大圓副焉其實質也出至車所信宿元帝降魏恭帝二年客長安太祖以客禮待之胡渭生曰簡文二十子惟大封大圓以壽終然皆歿關西不得一瞻陵寢故曰知西陵而誰望。周書以愛子作指愛子。史記高祖本紀曰蕭丞相營作未央宮立東闕北闕高后紀曰太尉遂將北軍然尚有南軍令平陽侯告衛尉毋入相國產殿門呂產迺入未央宮欲爲亂

殿門弗得入朱虛侯殺產漢書百官公卿表曰衛尉掌宮門衛屯兵胡渭生曰通考（文獻通考兵考）漢京師有南北軍之屯南軍衛尉主之掌宮城內之兵按漢未央宮以北闕爲正門公車司馬亦在焉是知北闕之兵即衛尉所掌之南軍也。魏志三少帝紀曰甘露五年五月己丑高貴鄉公卒注引魏氏春秋曰戊子夜帝自將冗從僕射李昭黃門從官焦伯等下陵雲臺鎧仗授兵欲因際會自出討文王（司馬昭）擊戰鼓出雲龍門賈充自外而入皇師潰散成濟以矛進帝崩于師梁書簡文帝紀曰大寶二年八月戊午侯景遣衛尉卿彭儻廂公王僧貴率兵入殿廢太宗爲晉安王幽於永福寺冬十月壬寅王偉等進觴於帝帝知不免乃盡酣既醉寢偉乃出嚮進士夔王脩纂坐其上於是太宗崩於永福省時年四十九胡渭生曰言雖有宿衛兵仗而反爲賊臣所用不得如絳侯之誅呂氏高貴鄉公之討司馬也。英華雲作靈

司徒之表裏經綸。狐假之惟王實勤。橫瑠戈而對霸主。執金鼓而問賊臣。平吳之功壯於杜元凱。王室是賴深於溫太真。始則地名全節。終則山稱枉人。南陽校書去之。

已遠。上蔡逐獵。知之何晚。

以上弔王世辯

梁書王僧辯傳曰世祖卽帝位以僧辯功進授鎮衛將軍司徒。左僖二十八年子犯曰戰而捷必得諸侯若其不捷表裏山河必無害也易屯象傳曰君子以經綸。左僖二十五年曰狐偃言於晉侯曰求諸侯莫如勤王。晉語三曰公令韓簡挑戰穆公衡瑯戈出見使者韋注曰衡橫也彫鏤也戈戟也呂氏春秋賞直篇曰趙簡子攻衛附郭鼓之而士不起簡子投桴而歎曰嗚呼士之遯弊一若此乎行人燭過免冑橫戈而進曰亦有君不能耳士何弊之有。漢書吳王濞傳曰漢兵至膠西漢將弓高侯頽當遣王書王肉袒叩頭漢軍壁謁曰臣叩敢請菹醢之罪弓高侯執金鼓見之曰王苦軍事願聞王發兵狀。英華鼓作鞭注曰一作鼓。晉書杜預傳曰預字元凱京兆杜陵人也時帝密有滅吳之計而朝議多違唯預羊祜張華與帝意合祜病舉預自代預啓請伐吳之期帝報待明年方欲大舉預表陳至計帝乃許之預以太康元年陳兵於江陵旬日之間累克城邑皆如預策焉。晉書溫嶠傳曰嶠字太真司徒羨弟之子也（羨傳曰太原祁人）明帝卽位轉中書令嶠有棟梁之任帝親而倚之甚爲王敦所忌因請爲左司馬嶠還都具奏敦之逆謀請先爲之備及敦構逆謀加嶠中壘將軍持節都督東安

北部諸軍事事平封建寧縣開國公帝疾篤嬖與王導等同受顧命歷陽太守蘇峻反嬖爲江州刺史要陶侃同赴國難時陶侃雖爲盟主而處分規略一出於嬖及賊滅拜驃騎將軍封始安郡公卒帝下冊書曰惟公明鑒特達識心經遠倡率羣后五州響應首啓戎行元凶授馘王室危而復安三光幽而復明云云。文選西征賦曰紛吾旣邁此全節李善注曰全節卽漢書全鳩里戾太子死處圖經曰全節閿鄉縣東十里鳩澗西漢書武五子傳曰戾太子東至湖藏匿泉鳩里顏注曰泉鳩水在今閿鄉縣東南十五里見有戾太子冢冢在澗東也清統志曰河南陝州泉鳩水在閿鄉縣西南三十五里。水經淇水注曰淇水東北逕枉人山東牽城西元和郡縣志曰河北道衛州黎陽縣枉人山在縣西北四十二里或言紂殺比干於此清統志曰河南衛輝府善化山在濬縣西北二十五里高六十餘丈周三十里舊名枉人山庾信哀江南賦終則山稱枉人是也。周書終則作終以。梁書王僧辯傳曰敬帝初卽梁主位僧辯預樹立之功承制進驃騎大將軍中書監都督中外諸軍事錄尙書與陳霸先參謀討伐時齊主高洋又欲納貞陽侯淵明以爲梁嗣因爲僧辯書貞陽前後頻與僧辯書論還國繼統之意僧辯不納及貞陽至于東關散騎常侍裴之橫率衆拒戰敗績僧辯因遂謀納貞陽仍定君臣之禮

因求以敬帝爲皇太子貞陽既踐僞位仍授僧辯大司馬領太子太傅揚州牧餘悉如故陳霸先時爲司空南徐州刺史自京口舉兵十萬水陸俱至襲于建康於是水軍到僧辯常處於石頭城是日正視事軍人已踰城北而入南門又馳白有兵來僧辯與其子顓遽走出閣衆軍悉至僧辯計無所出乃據南門樓乞命拜請霸先因命縱火焚之方共顓下就執夜斬之南史僧辯傳曰是夜及子顓俱被絞殺。南陽二句舊注皆引吳越春秋案句踐伐吳外傳曰范蠡爲書遺文種曰子若不去將害於子文種不信其言越王遂賜文種屬盧之劍種得劍歎曰南陽之宰而爲越王之擒自笑曰後百世之末忠臣必以吾爲喻矣遂伏劍而死此與校書二字意終不合又英華注曰一作南山案鄭康成在南城山注孝經與此不合疑別有事俟考。史記李斯傳曰二世二年七月具斯五刑論腰斬咸陽市斯出獄與其中子俱執顓謂其中子曰吾欲與若復牽黃犬俱出上蔡東門逐狡兔豈可得乎遂父子相哭而夷三族

鎮北之負譽矜前風颯凜然水神遭箭山靈見鞭是以螫熊傷馬浮蛟沒舟才子并

命俱非百年以上弔邵陵王綸

梁書高祖三王傳曰邵陵攜王綸字世調高祖第六子也中大同元年出爲鎮東將軍南徐州刺史太清二年侯景構逆加征討大都督率衆討景綸乃晝夜兼道遊軍入赴濟江中流風起人馬溺者十一二遂率寧遠將軍西豐公大春新塗公大成等步騎三萬發自京口直指鍾山賊徒大駭分爲三道攻綸綸與戰大破之斬首千餘級翌日賊又來攻相持日晚賊稍引卻安南侯駿以數十騎馳之賊回拒駿駿部亂賊因逼大軍軍遂潰綸至鍾山衆裁千人賊圍之戰又敗乃奔還京口三年春綸復與東揚州刺史大連等入授至于驃騎洲進位司空臺城陷奔禹穴大寶元年綸至郢州刺史南平王恪讓州於綸綸不受乃上綸爲假黃鉞都督中外諸軍事綸於是置百官改廳事爲正陽殿大修器甲將討侯景元帝聞其彊盛乃遣王僧辯帥舟師一萬以逼綸綸軍潰遂與子確等十餘人輕舟走武昌復收散卒屯于齊昌郡侯景將任約襲綸綸又敗走定州復歸齊昌行至汝南西魏所署汝南城主李素者綸之故吏開門納之西魏遣大將軍楊忠攻之城陷忠等執綸綸不爲屈遂害之投于江岸經日顏色不變鳥獸莫敢近焉時年三十三百姓憐之爲立祠廟後世祖追謚曰携長子堅字長白封汝南侯景圍城陷堅遇害弟確字仲正封爲正階侯後徙封永安鍾山之役確苦戰所向披靡及景背盟高祖使

確爲慰勞文確旣出見景景愛其膂力恆令在左右後爲賊所害南史梁武帝諸子傳附確傳曰後與景獵鍾山同逐禽引弓將射景弦斷不得發賊覺殺之案梁書但言綸爲鎮東將軍此賦云鎮北陸繁詔謂鎮北疑作鎮東然南史并不載爲鎮東將軍未知梁書與本賦孰是或綸嘗授鎮北史不具亦未可知倪謂綸傳大同中綸嘗爲揚州刺史揚州在江北故曰鎮北非也通典職官十一載四鎮將軍始於漢末及魏則不得謂非將軍之名而泛稱鎮北綸爲揚州刺史是否兼鎮北將軍本傳及武帝本紀皆不載亦不能臆定也。史記秦始皇本紀曰始皇夢與海神戰如人狀問占夢博士曰水神不可見以大魚蛟龍爲候乃令入海者齎捕巨魚具而自以連弩候大魚出射之。山靈句見上鞭石注。熱熊二句喻綸爲賊所敗也隋書五行志曰邵陵王綸將兵援臺城至鍾山有熱熊無何至齎綸所乘馬綸尋爲王僧辯所敗亡至南陽爲西魏所殺南史梁武帝諸子傳曰綸發白下中江而浪起有物蕩舟將覆識者尤異之案綸討景時中江浪起未明言爲蛟則隋志熱熊事疑即因子山此賦而附會之古人賦當時事未必卽用其實事也若以此二句皆爲綸之實事則水神二句豈亦綸之實事乎。英華螢作執殆壞字又船作鳶。左文十八年曰高陽氏有才子八人又曰高辛氏有才子八人世濟其美

倪曰武帝有子八人故賦比之高陽之數名曰才子併命謂元帝與之作難也吳先生曰綸子確與父俱被害故云并命注誤步瀛案晉書卞壺傳引訥議曰壺父子并命可與此相證。集并作併

中宗之夷凶靖亂。大雪冤恥。去代邸而承基。遷唐郊而纂祀。反舊章於司隸。歸餘風於正始。沈猜則方逞其欲。藏疾則自矜於已。天下之事沒焉。諸侯之心搖矣。既而齊交北絕。秦患西起。况背關而懷楚。異端委而開吳。驅綠林之散卒。拒驪山之叛徒。營軍梁。羨菟乘巴渝。問諸淫昏之鬼。求諸厭劾之巫。荆門遭廩延之戮。夏口濫遼泉之誅。蔑因親於教愛。忍和樂於張弧。既無謀於肉食。非所望於論都。未深思於五難。先自擅於三端。登陽城而避險。臥砥柱而求安。既言多於忌刻。實志勇於刑殘。但坐觀於時變。本無情於急難。地惟黑子。城猶彈丸。其怨則黷。其盟則寒。豈冤禽之能塞海。

非愚叟之可移山以上彼元帝中興之業不終

梁書元帝紀曰承聖三年十二月辛未西魏害世祖遂崩焉時四十七明年四月追尊為孝元皇帝廟曰世祖吳曰此蓋借用晋事干寶晋紀總論曰淳耀之烈未渝故大命重集于中宗元皇帝。陸士衡高祖功臣頌曰夷凶翦亂史記太史公自序曰為弱燕報彊齊之讎雪其先君之恥作樂毅列傳第二十。史記孝文帝本紀曰孝文皇帝高祖中子也立為代王高后八年七月高后崩九月諸呂欲為亂大臣共誅之丞相陳平太尉周勃等使人迎代王代王命宋昌參乘乘傳詣長安馳至渭橋羣臣拜謁稱臣太尉乃跪上天子璽符代王謝曰至代邸而議之遂馳入代邸羣臣從至皆伏固請遂即天子位。史記五帝本紀曰帝摯立不善崩而弟放勛立是為帝堯御覽皇王部引帝王世紀曰帝摯封異母弟放勛為唐侯摯在位九年政輒弱而唐侯德盛諸侯歸之摯服其義乃率其羣臣造唐朝而致禪因委心願為臣唐侯於是知有天命乃受帝禪與史記異胡渭生曰西京賦繼體承基劉琨勸進表郊廟或替則宗哲纂其祀又曰元帝簡文之異母弟兄終弟及猶堯之代摯文之代惠故以為比。後漢書光武帝紀曰更始將北都洛陽以光武行司隸校尉使前整修宮府於是置僚屬作文移一如舊章時三輔吏

士東迎更始見諸將過皆冠幘而服婦人衣諸子繡編莫不笑之及見司隸僚屬皆歡喜不自勝老吏或垂涕曰不圖今日復見漢官威儀由是識者皆屬心焉。正始魏少帝齊王芳年號世說新語賞譽篇曰王敦爲大將軍鎮豫章衛玠避亂從洛投敦相見欣然談話彌日于時謝鯤爲長史敦謂鯤曰不意永嘉之中復聞正始之音晉書王衍傳曰魏正始中何晏王弼等祖述老莊立論以爲天地萬物皆以無爲爲本無也者開物成務無往不存者也宋書張緒傳曰吏部尙書袁粲言于帝曰臣觀張緒有正始遺風。南史梁本紀曰世祖孝元皇帝性好矯飾多猜忌於名無所假人微有勝己者必加毀害隋書五行志曰梁元帝旣平侯景破蕭紀而有驕矜之色性又沈猜由是臣下離貳即位三年而爲西魏所陷帝竟不得其死。左宣十五年伯宗曰山藪藏疾。左昭二十三年吳公子光曰三國敗諸侯之師乃搖心矣。史記楚世家陳軫曰西起秦患北絕齊交則兩國之兵必至陸繁昭曰承聖元年齊主命郭元建拔陽平斛斯昭拔歷陽又遣元建等圍秦郡二年使元建治水軍於合肥將襲建康納湘潭侯退三年齊將王球攻宿豫雖使命往來而兵爭彌甚是齊交北絕也承聖二年西魏遣尉遲迴襲陷益州三年遂遣于謹等大舉伐江陵是秦患西起也西魏都長安故引秦爲比。史記項羽本紀贊

曰及羽背關懷楚放逐義帝而自立怨王侯叛已難矣漢書項籍傳顏注曰背關謂背約不王高祖於關中懷楚謂思東歸而都彭城顧炎武日知錄曰背關懷楚謂舍關中形勝之地而都彭城如師古之解乃背約非背關也。左哀七年子服景伯曰太伯端委以治周禮杜注曰端委禮衣也孔疏引王肅曰委貌之冠立端之衣也史記吳太伯世家曰太伯之犇荆蠻自號句吳左太冲吳都賦曰有吳之開國也肇自泰伯陸繁弼曰江陵楚地建康吳地帝不都建康而都江陵故信指其失。綠林見徐孝穆與王僧辯書注。驪山見上又史記黥布傳薛公曰布故驪山之徒也陸繁弼曰承聖元年十月長史陸納據湘州以叛零陵人李弘雅請討之侯景之亂弘雅據其郡上即以爲營州刺史及是討納兵敗降納又承聖元年八月武陵王紀引兵東下二年五月帝拔任約於獄助陸法和拒紀又拔謝蒼仁於獄助法和約蒼仁皆侯景羽翼也。左莊四年曰楚武王伐隨卒于櫛木之下令尹鬬祁莫敖屈重除道梁澆營軍臨隨杜注曰澆水在義陽厥縣西東南入鄢水梁橋也孔疏曰釋例曰義陽厥縣西有澆水源出縣北從縣西南至隨縣入鄢水杜以澆解澆蓋聲相近而字轉耳水經澗水注曰澆水出隨縣西北黃山南逕灑西縣西又東南逕隨縣故城西春秋魯莊公四年除道梁澆謂此水也清統志曰湖

北德安府澧水在隨州西北（今改縣）今名扶恭河。左成十六年曰補卒菟乘杜注曰菟閱也漢書禮樂志顏注曰巴巴人也俞俞人也當高祖初爲漢王得巴俞人竝趨捷善鬪與之定三秦滅楚因存其武樂也晉書樂志曰漢高祖自巴漢將定三秦閩中范因率蠻人以從爲前鋒高祖樂其猛銳數觀其舞後使樂人習之閩中有渝水因其所居故名曰巴渝舞案唐山南道巴州治化成縣今四川巴中縣治唐劍南道渝州治巴縣今四川巴縣治乃漢之巴郡江州縣。左僖十九年曰夏宋公使邾文公用鄆子於次睢之社欲以屬東夷司馬子魚曰今一會而虐二國之君又用諸淫昏之鬼。三國志魏志董卓傳附李傕傳注引獻帝起居注曰傕性喜鬼怪左道之術常有道人及女巫歌謳擊鼓下神祠祭六丁符劾厭勝之具無所不爲陸繁弼曰承聖二年前上聞武陵王東下使方士畫板爲紀像親釘支體以厭之（通鑑百六十五）步瀛案南史梁本紀曰元帝特多禁忌牆壁崩倒屋宇傾頽年月不便終不修廟庭草蕪令鞭去之。荆門句倪曰謂元帝命樊猛斬武陵王紀也案梁書武陵王紀傳曰紀字世詢高祖第八子也都督益梁等十三州諸軍事益州刺史高祖崩乃僭號於蜀改元曰天正太清五年夏四月紀帥軍東下至巴郡以討侯景爲名將圖荆峽五月丁丑紀次于西陵軍容甚盛世祖命

護軍將軍陸法和於峽口夾岸築二壘鎮江以斷之時陸納未平蜀軍復逼世祖憂焉乃拔任約於獄以爲晉安王司馬撤禁兵以配之復於獄拔謝蒼仁爲步兵校尉配衆一旅上赴法和紀將侯叔率衆緣山將規進取任約謝蒼仁與戰破之旣而陸納平諸軍並西赴王琳宋邁任約謝蒼仁等因進攻於是兩岸十餘城俱降將軍樊猛獲紀及其第三子圓滿俱殺之於峽口有司奏請絕其屬籍世祖許之賜姓饜饜氏南史梁武諸子傳曰元帝與紀書又爲詩曰回首望荆門驚浪且雷奔又曰游擊將軍樊猛率所領至紀所圍而守之法和馳啓上密敕樊猛曰生還不成功也猛率甲士拔刀升舟猶左右奔擲第五子圓滿馳來就父紀首旣落圓滿軀亦分文選江賦曰荆門闕竦而磐礪李善注引盛弘之荆州記曰郡西派江六十里南岸有山名曰荆門北岸有山名曰虎牙二山相對楚之西塞也荆門上合下開達山南有門形故因以爲名清統志曰湖北荆州府荆門山在宜都縣西北五十里左隱元年曰太叔收貳以爲己邑至于廩延將襲鄭公聞其期曰可矣命子封帥車二百乘以伐東京叛太叔段段入于鄆公伐諸鄆太叔出奔共杜注曰廩延鄭邑陳留酸棗縣北有建津水經河水注曰河水又東逕滑臺城北城即故鄆廩延也沈欽韓左傳地名補注曰據此廩延即今滑縣唐之滑州漢晉爲白馬縣

杜預謂酸棗縣之延津非也。夏口句倪曰謂元帝攻邵陵王綸綸卒爲魏所殺是禍由元帝也案綸事已見上夏口見沈休文金庭館碑注左莊三十二年曰公疾間後於叔牙對曰慶父材問於季友對曰臣以死奉般公曰鄉者牙曰慶父材成季使以君命命儋叔待于鍼巫氏使鍼季酖之飲之歸及遼泉而卒杜注曰遼泉魯地清統志曰山東兗州府遼泉在曲阜縣東南三里倪曰儋叔成季皆桓公之子以喻邵陵湘東皆武帝子以弟害兄也。周書既作慨。孝經曰聖人原巖以敬教因親以敬愛。英華於教作以致。詩常棣曰兄既翕和樂且耽孟子告子下其兄關弓而射之案關彎字通。左莊十年曹鬪曰肉食者鄙未能遠謀。周書既作慨。後漢書文苑杜篤傳曰篤以關中表裏山河先帝舊京不宜改營洛邑迺上奏論都賦潘安仁西征賦曰非所望於蕭傳案南史周弘正傳曰侯景平僧辯啓送秘府圖書勅弘正讐校時朝議遷都但元帝再臨荆陝前後二十餘年情所安戀不欲歸建業故府臣僚皆楚人並欲即都江陵云建康蓋是舊都彫荒已極且王氣已盡兼與北止隔一江若有不虞悔無所及且臣等又聞荆南有天子氣今其應矣元帝無去意時尙書左僕射王褒及弘正咸侍帝顧曰卿意何如褒等以帝猜忌弗敢衆中公言唯唯而已褒後因清閒密諫還丹陽甚切帝雖納之色

不悅及明日衆中謂褒曰卿昨勸還建鄴不爲無理吾昨夜思之猶懷疑惑褒知不引納乃止他日弘正乃正色諫至于再三弘正退後黃羅漢宗懷乃言弘正王褒並東人仰勸東下非爲國計弘正竊知其言他日乃復上前面折二人曰若東人勸下東謂之私計西人勸住西亦是私計不衆人默然而人情竝勸遷都上又曾以後堂大集文武其預會者四五百人帝欲徧試人情曰勸吾去者左袒於是左袒者過半武昌太守朱買臣上舊左右而闈人也及是勸上遷曰買臣家在荊州豈不願官長住但恐是買臣富貴非官富貴邪上深感其言卒不能用。左昭十三年叔向曰取國有五難有寵而無人一也有人而無主二也有主而無謀三也有謀而無民四也有民而無德五也楚君子干涉五難以弑舊君誰能濟之。三端見蒼趙王啓注。左昭四年司馬侯曰陽城九州之險也杜注曰陽城在陽城縣東北案陽城山在今河南登封縣東北。禹貢底柱孔疏曰底柱在太陽關東水經河水注曰砥柱山名也昔禹治洪水山陵當水者鑿之故破山以通河河水分流包山而過山見水中若柱然故曰砥柱也案砥柱在今河南陝縣東北吳曰晏殊類要引賦注尸子比干諫紂曰今日之危無異登陽城而避險臥砥柱而求安也（案晏殊類要今不可見未知吳氏尙見原書抑轉引也尸子此文及下君子吞

聲諸家輯尸子者亦未之及）倪曰謂元帝即安荆楚猶登至險以避險臥不安以求安也。周書兩而字作於。左僖九年公孫枝曰今其言多忌克。英華兩於字作而又刑作形案實志勇於刑殘猶言以勇於刑殺逞其志耳作形非也胡渭生曰吳越春秋椒丘訢爲齊使於吳過淮津飲馬於津水水中有神出取其馬馬沒訢大怒袒裼持劍入水求神決戰連日乃出眇其一目遂之吳訢恃其勇有凌人之氣要離乃挫訢曰形殘名勇勇士所恥不即喪命於敵而戀其生猶徵色於我哉（閩閩內傳）按此豈因湘東一目欲以此相誚耶姑記之案如胡氏說語太輕薄恐非對舊君之道子山必不出此吳越春秋字面偶合耳當以周書作刑爲正。魏志王粲傳粲曰劉表雍容荆楚坐觀時變詩常棣曰兄弟急難胡渭生曰梁武捨孫而立庶諸王各不相下幸國家之有變而因以爲利湘東聞侯景之難遷延不進其心以爲簡文尙在則已雖有不亂之功亦不得立且忌諸王之有功而與己爭帝故一戕河東再戕邵陵武陵欲東下則以書止之然後遣王僧辯等將兵討景所向克捷猶令頓軍尋陽持兩端以觀望及簡文遇弑然後命僧辯東下其處心積慮大可見矣方僧辯之發江陵也啓湘東王曰平賊之後嗣君萬福未審何以爲禮王曰六門之內自極兵威僧辯曰討賊之謀臣爲己任成濟之事請

別舉人乃密諭朱買臣使爲之所景敗太宗已殂遂沈豫章王棟及二弟橋樛於水向使簡文無恙則買臣爲成濟矣又何急難之有坐觀時變無情急難推見至隱深誅其意之辭也。漢書賈誼傳誼上疏曰淮陽之比大諸侯蘆如黑子之著面顏注曰黑子今所謂厯子也。周書惟作爲。史記平原君傳趙郝曰此彈丸之地弗予令秦來年復攻王王得無割其內而媾乎案南史梁本紀曰自侯景之難州郡大半入魏自巴陵以下至建康緣以長江爲限荊州界北盡武寧西拒峽口自嶺以南復爲蕭勃所據文軌所同千里而近此子山所以有黑子彈丸之譬也。左宣十二年曰君無怨讎說文曰讎痛怨也案黷讎之通借字。左哀十二年子貢曰今吾子曰必尋盟若可尋也可寒也。胡渭生曰蕭奮遣使求援於魏以妃王氏及世子釁爲質帝使柳仲禮率衆趣襄陽魏遣楊忠救之擒仲禮盡俘其衆大寶元年王僧辯克長沙斬河東王譽承聖二年魏宇文泰欲圖江陵營聞之益重其獻貢欲倚魏以報譽之仇故曰其怨則顯楊忠進逼江陵帝送子方略爲質以求和與忠盟曰魏以石城爲封梁以安陸爲界請同附庸并送質子忠乃還承聖三年魏使至江陵帝請據舊圖定疆境辭頗不遜泰由是決計南伐故曰其盟則寒。精衛填海愚公移山並見擬連珠注述異記曰精衛一名寃禽又名志鳥

俗呼帝女雀

况以沴氣朝浮。妖精夜隕。赤鳥則三朝夾日。養雲則七重圍軫。亡吳之歲既窮。入郢之年斯盡。周含鄭怒。楚結秦冤。有南風之不競。值西鄰之責言。俄而梯衝亂舞。冀馬雲屯。餞秦車於暢穀。沓漢鼓於雷門。下陳倉而連弩。渡臨晉而橫船。雖復楚有七澤。人稱三戶。箭不麗於六廩。雷無驚於九虎。辭洞庭兮落木。去潞陽兮極浦。熾火兮焚旗。貞風兮害蠱。乃使玉軸揚灰。龍文斫柱。下江餘城。長林故營。徒思柑馬之秣。未見燒牛之兵。章曼枝以穀走宮之奇。以族行河無冰而馬渡關未曉。而雞鳴忠臣解骨。君子吞聲。章華望祭之所。雲夢僞遊之地。荒谷縊於莫敖。治父囚於羣帥。頰谷摺拉。鷹鷂批攢。冤霜夏零。憤泉秋沸。城崩杞婦之哭。竹染湘妃之淚。以上叙江陵之亡

續漢書五行志曰氣之相傷謂之沴劉注引尚書大傳曰凡六沴之作歲之朝月之朝日之朝

則后王受之。開元占經妖星占引黃帝占曰凡妖星所出形狀不同爲殃如一其出不過一年若三年必有破國屠城其君死亡天下大亂白虎通日月篇曰星者精也。周書隕作殞字

同。梁史元帝紀曰承聖三年六月癸未有黑氣如龍見于殿內南史梁本紀曰元帝承聖三年十一月庚子夜有流星墜城中。左哀六年曰是歲也有雲如衆赤鳥夾日以飛三日楚子使問諸周大史周大史曰其當王身乎。集鳥作鳥周書與左傳合今從之。御覽職官部三十二引春秋文耀鉤曰楚立唐氏(注曰以爲史官)蒼雲如蝮圍軫七蟠中有荷斧之人嚮軫而蹲楚驚唐史曰君慢命又簡宗廟以無禮見患七國俱謀皆懷屠君於是立禮正推禱醮於廟堂之前(以無禮以下依北堂書鈔職官部補)。南史梁本紀曰初承聖二年三月有二龍自南郡城西升天百姓聚觀五采分明江陵故老竊相泣曰昔年龍出建康淮西天下大亂今復有焉禍至無日矣帝聞而惡之輸年而遭禍。亡吳入郢并見思舊銘注北史藝術庾季才傳曰梁元帝亦頗明星歷謂曰朕猶虜禍起蕭牆季才曰秦將入郢陛下宜還都以避其患。左隱三年曰周鄭交惡又僖二十四年曰王怒將以狄伐鄭周書蕭譽傳曰魏恭帝元年太祖令柱國于謹伐江陵誓以兵會之倪曰周合鄭怒謂誓以元帝殺其兄譽遂結讐也。史記楚世家曰楚王遂絕和於秦倪曰楚結秦冤謂西魏來伐也。左襄十八年曰晉人聞有楚師師曠曰不害吾驟歌北風又歌南風南風不競多死聲楚必無功。左僖十五年曰秦伯伐晉戰

于韓原秦獲晉侯以歸初晉獻公筮嫁伯姬於秦遇歸妹之睽史蘇占之曰不吉其繇曰西鄰責言不可償也又曰車脫其輻火焚其旗不利行師敗于宗區。後漢書公孫瓚傳瓚密使人齋書告續曰（續瓚子）袁氏之攻狀若鬼神梯衝舞吾樓上鼓角鳴於地中。左昭四年曰冀之北土馬之所生陸士衡從軍行曰胡馬如雲屯。詩秦風曰小戎棧收又曰文茵暢轂毛傳曰小戎兵車也淺收軫也暢轂長轂也。漢書王遵傳曰遷爲東平相謁見王太傅在前說相鼠之詩尊曰毋持布鼓過雷門顏注曰雷門會稽城門也有大鼓越擊此鼓聲聞洛陽故尊引之也。蜀志諸葛亮傳曰建興六年冬亮復出散關圍陳倉又曰亮性長於巧思損益連弩木牛流馬皆出其意。史記淮陰侯傳曰以信爲左丞相擊魏魏土盛兵蒞坂塞臨晉信乃益爲疑兵陳船欲渡臨晉而伏兵從夏陽以木罌匭渡軍襲安邑案臨晉今陝西大荔縣治。七澤已見上。史記項羽本紀范增說項梁曰楚南公曰楚雖三戶亡秦必楚也。左宣十二年曰樂伯左射馬而右射人樂輿於前射樂麗龜杜注曰麗著也龜背之隆高當心又魏錡請戰而還楚潘黨逐之乃斃澤見六樂射一樂以顧獻。漢書王莽傳下曰莽拜將軍九人皆以虎爲號號曰九虎後漢書馮衍傳衍乃說永（鮑永）曰皇帝率宛葉之衆將離散之兵喞血昆陽

長驅武關破百萬之陣摧九虎之軍雷震四海席卷天下。楚辭九歌湘夫人曰洞庭波兮木葉下湘君曰望涪陽兮極浦海內東經曰湘水入洞庭下郭注曰洞庭地穴在長沙巴陵也水經澧水注曰澧水入唐縣左合涪水案洞庭在今湖南岳陽縣西南涪水在湖北公安縣西東南流入湖南澧縣胡渭謂九歌望涪陽兮極浦卽水之北也又案以上六句皆言江陵兵弱不能拒西魏之軍遂致四散奔潰也舊注以洞庭二句爲子山自叙先使於魏按之上下文勢均覺不安。焚旗見上西鄰責言注又僖十五年秦伯伐晉卜徒父筮之其卦遇蠱曰千乘三去三去之餘獲其雄狐夫狐蠱必其君也蠱之貞風也其悔山也歲云秋矣我落其實而取其材所以克也實落材亡不敗何待梁書元帝紀曰十一月辛卯魏軍大攻世祖出柩把門親臨督戰胡僧祐中流矢薨六軍敗績。梁簡文帝吳郡石像碑曰寧須玉軸。博物志器名攷曰干將陽龍文莫邪陰漫理此二劍吳王使干將作。南史梁帝紀曰謝答仁求自將帝以問僕射王褒褒曰答仁侯景之黨是豈可信成彼之勳不如降也乃聚書十餘萬卷盡燒之遂使皇太子王褒出質請降帝乘白馬素衣出東門抽劍擊闔曰蕭世誠一至此乎通鑑梁紀(二十一)曰帝入東閣竹殿命舍人高寶善焚古今圖書十四萬卷又以寶劍斫柱今折歎曰文武之道

今夜盡矣考異曰隋經籍志云焚七萬卷南史云十餘萬卷按王僧辯所送建康已八萬卷并江陵舊書豈止七萬卷乎今從典要。漢書王莽傳下曰地皇元年南郡張霸江夏辛牧王匡等起雲杜綠林號曰下江兵衆皆萬餘人注晉灼曰本起江夏雲杜縣後分西上入南郡屯藍口故號下江兵也。宋書州郡志曰荊州武寧長林晉安帝立清統志曰湖北安陸府長林故城在荊門州北陸繁紹曰下江長林皆武寧郡地武寧以北即接襄陽時荆雍之隙已深武寧實爲要地故承聖三年王琳意欲鎮武寧爲國捍禦事不果（見南史王琳傳）及魏軍濟漢襲武寧執宗均遂長驅向江陵矣。公羊宣十五年司馬子反曰吾聞之也圍者柑馬而秣之使肥者應客何注曰秣者以粟置馬口中柑者以木銜其口不欲令食粟示有畜積阮元校勘記曰柑當作拊徐炯曰魏師至凡二十八日徵兵四方未至而城克故曰徒思拊馬之秣。周書柑作箝。史記田單傳曰田單乃收城中（即墨）得千餘牛爲絳繒衣畫以五彩龍文束兵刃於其角而灌脂束葦於尾燒其端鑿城數十穴夜縱牛壯士五千人隨其後牛尾熟怒而奔燕軍燕軍夜大驚牛尾炬火光明炫耀所觸盡死傷燕軍大駭敗走周書楊忠傳曰于謹伐江陵忠爲前軍屯江津遇其走路梁人束刃於象鼻以戰忠射之二象反走徐樹穀曰四句追叙武

寧既克江陵失險而其旁邑力微不能興恢復之師也。呂氏春秋權勳篇曰中山之國有風
繇者智伯欲攻之而無道也爲鑄大鐘方車二軌以遺之風繇之君將斬岸堙谿以迎鐘赤章
蔓枝諫弗聽赤章蔓枝曰爲人臣不忠貞罪也忠貞不用遠身可也斷轂而行至衛七日而風
繇亡。周書枝作支。左傳五年曰晉侯復假道於虞以伐虢宮之奇諫弗聽許晉使公之奇
以其旅行曰虞不臘矣在此行也晉不更舉矣陸繁弼曰承聖三年十一月魏軍至江陵城柵
下信州刺史徐世譜晉安王司馬任約軍次馬頭岸城陷世譜約走巴陵後約降于齊世譜東
下依侯瑊後入陳步瀛案此與章蔓枝宮之奇二人不甚類當時必有陳計不用而去者不必
悉指其人以實之。後漢書王霸傳曰光武至下曲陽傳聞王郎兵在後從者皆恐及至滹沱
河候吏還白河水流澌無船不可濟官屬大懼光武令霸往視之霸恐驚眾欲且前阻水還卽
詭曰冰堅可度官屬皆喜遂前比至河河冰亦合乃令霸護度未畢數騎而冰解。鷄鳴見徐
孝穆與楊僕射書注。越語下曰聖人不出忠臣解骨。吳曰晏殊類要引賊注尸子小人在
上則忠詐不分君子吞聲。左昭七年曰楚子爲章華之宮杜注曰章華南郡華容縣又曰楚
子成章華之臺杜注曰臺在今華容城內楚語上曰靈王爲章華之臺韋注曰章華地名吳語

曰乃築臺於章華之上水經沔水注曰揚水東入離湖湖側有章華臺臺高十丈基廣十五丈
清統志曰湖北荊州府章華臺在監利縣西北又哀六年楚昭王曰三代命祀祭不越望江漢
睢章楚之望也杜曰諸侯望祀竟內山川星辰。史記高祖本紀曰六年十二月人有上變事
告楚王信謀反上用陳平計乃僞游雲夢會諸侯於陳楚王信迎即因執之。左莊十三年曰
楚屈瑕伐羅羅與盧戎兩軍之大敗之莫敖縊於荒谷羣帥囚於冶父以聽刑杜注曰荒谷冶
父皆楚地又十一年注曰莫敖楚官名卽屈瑕水經沔水注曰陂水又涇郢城南東北流謂之
揚水又東北路白湖水注之湖在大港北港南中湖南隄下曰昏官湖三湖合爲一水東通荒
谷荒谷東岸有冶父城春秋傳曰莫敖縊于荒谷羣帥囚於冶父謂此處也寰宇記山南東道
荊州江陵縣引盛弘之荊州記曰荒父西北有苑號曰王園北有小城名曰冶父城清統志曰
湖北荊州府冶父城在江陵縣東南。劄谷見謝滕王啓注漢書儒林傳顏注曰今新豐縣溫
湯之處號愍儒鄉西南三里有馬谷谷之西岸有坑古老相傳以爲秦隄儒處也寰宇記曰關
西道雍州坑儒谷在縣東南五里案卽劄谷也史記范雎傳曰魏齊使舍人笞擊雎拉脇摺齒
。周書劄谷作劄窳案說文無劄字當作阱阱窳同作劄窳非也。左文十八年曰如鷹鷂之

逐鳥雀也。集韻曰：攢芳味功擊仆也。文選江文通詣建平王上書，李善注引淮南子曰：鄒衍盡忠於燕，惠王信譖而繫之。鄒子仰天而哭，正夏天爲之降霜，初學記天部下御覽天部十四皆引之。正夏並作夏五月，其餘字句亦小有異同。今淮南子無此文。憤泉事俟考舊注引公羊昭五年：潰泉及耿恭拜井出泉，事皆不合。杞婦湘妃並見擬連珠注。

水毒秦涇山高趙。涇十里五里長亭短亭，飢隨蟄燕暗逐流螢。秦中水黑關上泥青。於時瓦解冰泮，風飛電散，渾然千里，溜澗一亂。雪暗如沙，冰橫似岸。逢赴洛之陸機，見離家之王粲。莫不聞隴水而掩泣，向關山而長歎。况復君在交河，妾在青波。石望夫而逾遠，山望子而逾多。才人之憶代郡公主，去清河榭陽亭，有離別之賦。臨江王有愁思之歌。以上叙梁人被掠入囚之苦

左襄十四年曰：夏諸侯之大夫從晉侯伐秦，濟經而次，秦人毒涇，上流師人多死。爾雅釋山曰：山絕，陁郭注曰：連山中斷。紹史記趙世家曰：與之陁，集解引徐庶曰：陁者，山絕之名。常山有井，陁中山有苦陁。和志曰：河北道懷州河內縣太行陁，在西北三十里。連山中斷曰：陁。述征記

曰太行山首始于河內北至幽州凡有八陁案呂氏春秋有始篇井陘列九塞之一高注曰井陘在常山井陘縣。白孔六帖卷九引十里五里二句注曰言十里一長亭五里一短亭。螿燕見謝趙王賚米啓。後漢書靈帝紀曰中平六年八月張讓段珪等劫少帝陳留王走小平津尙書盧植追讓珪等斬數人其餘投河而死帝與陳留王協夜步逐螢光行數里得民家露車共乘之。書禹貢曰黑水西河惟雍州。晉書姚泓載記曰劉裕次于陝城遣沈林子率精兵萬餘越山開道會沈田子等于青泥元和志曰關內道京兆府藍田縣縣理城即驍柳城也俗亦謂之青泥城。陳孔璋爲袁紹檄豫州曰太尉帥師甫入滎陽則七國之軍瓦解冰泮潘安仁西征賦曰縑瓦解而冰泮。英華電作雹。呂氏春秋精誠篇孔子曰淄澠之水合者易牙嘗而知之高誘注曰淄澠齊之兩水名也倪曰以喻當時貴賤紊亂盡被虜辱矣。晉書陸機傳曰年二十而吳滅退居舊里閉門勤學至太康末與弟俱入洛。魏志王粲傳曰粲字仲宣山陽高平人也以西京擾亂乃之荊州依劉表倪曰言江陵亡已在長安遇諸見俘之人也。御覽地部十五引辛氏三秦記俗歌云隴頭流水鳴聲幽咽(州郡部十引作鳴咽)遙望秦川肝腸斷絕。江文通恨賦曰紫臺稍遠關山無極。交河見江文通與袁叔明書注史記陳

涉世家曰當陽君黥布之兵相收復擊秦左右校破之青波集解引漢書音義曰地名也沈欽韓漢書疏證曰青波卽青陂也水經淮水注淮水東逕白城南楚白公勝之邑也東北去白亭十里又東逕長陵戍南又東青陂水注之清統志曰河南汝寧府青陂在新蔡縣西南江文通別賦曰君居淄右妾家河陽倪曰青波楚地謂君往秦川妾留楚地夫婦離別之辭設爲閨怨也。周書青作清。初學記地部引劉義慶幽明錄曰武昌北山上有望夫石狀若人立古傳云昔有貞婦其夫從役遠赴國難携弱子餓送此山立望夫而化爲石因以爲名焉御覽妖異部引列異傳同。御覽居處部六引述異記曰中山有韓夫人愁思臺望子陵也（今述異記佚此文）。謝玄暉有詠邯鄲才人嫁爲廝養卒婦詩。清河公主事見徐孝穆與楊僕射書注。漢書藝文志賦有別栩陽五篇王應麟漢藝文攷證據此賦謂栩陽蓋亭名顧炎武日知錄謂詳漢志上下文例當是人姓名姓別名栩陽沈濤銅熨斗齋隨筆謂別栩陽當是別姓封栩陽亭侯兵陰陽家有別成子望軍氣六篇古有別姓元和姓纂引姓苑云京兆人王先謙漢書補注姚震宗漢書藝文志條理皆以封栩陽亭侯之說爲非是然庾子山夜聽搗衣曲云栩陽離別賦與此賦同閻若璩王先謙謂當有所據是也。漢書藝文志有臨江王及愁思節士

歌詩四篇案臨江王榮以孝景前四年立爲皇太子四歲廢爲臨江王三歲坐侵廟墻地爲宮事自殺百姓憐之見漢書景十三王傳及酷吏郅都傳王應麟曰陸厥擬臨江王節士歌王先謙曰李白亦有擬臨江王節士歌杜甫魏將軍歌所謂千秋萬歲奉聖明臨江節士安足數也步瀛案詳志文及字似是臨江王歌外又有臨江王愁思臨江王節士二歌

別有飄飄武威羈旅金微班超生而望返溫序死而思歸李陵之雙鳧永去蘇武之

一鴈空飛

以上自叙出使見留無家可歸

漢書地理志武威郡元注曰故匈奴休屠王地武帝太初四年開水經禹貢山水澤地所在篇注曰郡治武威續漢書郡國志後漢治姑臧案漢武威縣今甘肅鎮番縣北姑臧縣今甘肅武威縣治。金微見趙國夫人墓誌銘金山注。班超句見王子淵與周弘讓書射聲之魂注。

溫序句見徐孝穆與楊僕射書注。藝文類聚人部十三引蘇武別李陵詩曰雙鳧俱北飛一鳧獨南翔李陵贈蘇武詩曰雙鳧相背飛相違日已長。蘇武鴈見謝滕王啓注

若江陵之中否乃金陵之禍始雖借人之外力實蕭牆之內起撥亂之主忽焉中興

之宗不祀。伯兮叔兮。同見戮於猶子。荆山鵠飛。而玉碎隨岸。蛇生而珠死。鬼火亂於平林。殤魂遊於新市。梁故豐徙。楚實秦亡。不有所廢。其何以昌。有媯之後。遂育於姜。輸我神器。居爲讓王。以上叙江陵之滅。禪陳之勢已成。

倪曰承聖三年魏克江陵。明年敬帝至建業。是仍都金陵也。三年陳受禪。是金陵之禍矣。顏延年王給事諫曰。王略中否。周書若作昔。左襄十九年臧武仲曰。今將借人之力以救其死。論語季氏篇孔子曰。吾恐季孫之憂不在顓臾而在蕭牆之內也。集解引鄭注曰。蕭之言肅也。牆謂屏也。君臣相見之禮。至屏而加肅敬焉。是以謂之蕭牆。漢書昌邑王傳。登曰。亂作蕭牆。倪曰。北史庾季才傳云。梁元帝頗明星。歷謂季才曰。朕猶慮禍起蕭牆。按營以姪伐叔。是蕭牆之內起也。史記高祖本紀。羣臣皆曰。高祖起微細。撥亂世。反之正。左莊十一年。臧文仲曰。桀紂罪人。其亡也忽焉。漢書宣帝紀。贊曰。可謂中興。佗德殷宗。周宣矣。左文六年。臧文仲曰。阜陶庭堅。不祀忽諸。詩旄丘曰。叔兮伯兮。何多日也。禮記檀弓上曰。喪服兄弟之子猶子也。南史梁本紀曰。魏師至二十八日。徵兵四方未至。而城見尅。在幽逼。求酒飲之。製詩四章。梁王

警遣尙書傅準監行刑帝謂之曰卿幸爲我宣行準捧詩流涕不能禁進土囊而殞之梁王譽使以布帊纏屍斂以蒲席束以白茅以車一乘葬于津陽門外愍懷太子元良及始安王方略等皆見害陸繁弼曰歸元公補注云元帝爲岳陽之叔父元良以下於岳陽爲兄弟今賦云伯兮叔兮同見戮於猶子與史不合予謂毛詩叔兮伯兮長幼之通稱（詩籟兮毛傳曰叔伯言羣臣長幼也）賦語承中興句來若云元帝及長幼諸子同見戮於猶子云爾不以辭害意可也。荆山句見謝王啓注。淮南子覽冥篇高注曰隨侯漢東之國姬姓諸侯也隨侯見大蛇傷斷以藥傅之後蛇於江中銜大珠以報之因曰隨侯之珠蓋明月珠也又見搜神記卷二十水經澗水注曰澧水側有斷蛇丘隨侯出而見大蛇中斷因舉而藥之故謂之斷蛇丘陸繁弼曰鵠飛玉碎喻元帝構怨于晉而自致敗亡也蛇生珠死喻岳陽懷恩於魏而自殘骨肉也。說文曰犇兵死及牛馬之血爲犇犇鬼火也案俗作燐後漢書光武帝紀曰伯升於是招新市平林兵李賢注曰新市縣屬江夏郡故城在今郢州富水縣東北平林地名在今隨州隨縣東北清統志曰湖北德安府平林故城故隨州東北（今改縣）安陸府新市城在鍾祥縣東北。小爾雅廣名曰無主之鬼謂之殤楚辭九歌有國殤文選鮑明遠樂府出自薊北門行李注曰

國殤爲國戰亡也倪曰傷戰爭之後中興之臣死傷者多也。周書遊作驚。史記高祖本紀周市使人謂雍齒曰豐故梁徙也集解引文穎曰梁惠王孫假爲秦所滅轉東徙於豐故曰豐梁徙漢書高帝紀贊曰秦滅魏遷大梁都于豐故周市說雍齒曰豐故梁徙也倪曰梁故豐徙謂元帝從建業徙都江陵也江陵楚地魏都關中秦地是楚實秦亡也本豐故梁徙而云梁故豐徙本亡秦必楚而云楚實秦亡皆反文以切時事也。左傳僖十年里克曰不有廢也君何以興。左傳莊二十二年曰陳公子完奔齊初懿氏卜妻敬仲其妻占之曰吉是謂鳳皇于飛其鳴鏘鏘有媯之後將育于姜杜注曰媯陳姓姜齊姓倪曰有媯之後謂陳武帝也陳氏本虞舜之後在周爲陳國春秋時陳公子完奔齊其後遂姓陳氏陳武帝自襲殺王僧辯後而梁祚日微陳氏日盛矣。集遂育作將育。老子曰天下神器不可爲也潘安仁西征賦曰翰文武之神器。莊子有讓王篇梁書敬帝紀曰敬皇帝諱方智世祖第九子也承聖三年江陵陷太尉揚州刺史王僧辯司空南徐州刺史陳霸先定議以帝爲太宰承制奉迎還京師四年二月至自尋陽入居朝堂七月辛丑王僧辯納貞陽侯蕭淵明甲辰入于京師以帝爲皇太子九月甲辰陳霸先襲殺王僧辯黜蕭淵明丙午帝即皇帝位太平二年冬十月辛未詔禪于陳陳王

踐祚奉帝爲江陰王薨于外邸時年十六

天地之大德曰生。聖人之大寶曰位。用無賴之子弟。舉江東而全棄。惜天下之一家。遭東南之反氣。以鶉首而賜秦。天何爲而此醉。

以上追咎武帝不能豫戮子弟而生亂也。

天地二句易繫辭下之文。史記吳王濞傳袁盎曰吳所誘皆無賴子弟。吳先生曰無賴句謂

武帝不能豫教子弟而生亂也。周書弟作孫。吳志宗室傳注引干寶晉紀曰孫秀在晉朝

初聞皓降流涕曰昔討逆弱冠以一校尉創業。今後主舉江南而棄之。禮運曰聖人耐以天

下爲一家。史記吳王濞傳高祖召濞拊其背曰漢後五十年東南有亂者豈若邪。然天下同

姓爲一家也。慎勿反。文選西京賦曰昔者大帝說秦繆公而覲之饗以鈞天廣樂。帝有醉焉

乃爲金策錫用此土而翦諸鶉首。史記趙世家曰趙簡子疾五日不知人。醫扁鵲視之曰在昔

秦繆公嘗如此七日而寤。寤之日告公孫支與子輿曰我之帝所甚樂。帝告我晉國將大亂。五

世不安。公孫支書而藏之。今主君之疾與之同。不出三日。疾必間。間必有言也。居二日。半簡子

寤。語大夫曰我之帝所甚樂。與百神遊。鈞天廣樂。九奏萬舞。不類三代之樂。其聲動人心。李善

西京賦注引虞喜志林曰。嚳曰。天帝醉秦。禁金誤隕石墜。謂奏繆公夢天帝。奏鈞天樂。已有此嚳。又引列仙傳。讚曰。秦穆公受金策。祚世之業。漢書地理志曰。自井至柳。謂之鶉首。之次。秦之分也。李善曰。盡取鶉首之分爲秦之境也。案此段言天位之重。不可不慎。梁武封子弟於大郡。使各希非分。及侯景亂起。坐觀成敗。不盡力討賊。遂致臺城之陷。雖湘東滅賊。終以東南亂後。徙都江陵。魏師一至。竟至滅亡。前四句結金陵。後四句結江陵。總結哀江南之本意。以下乃自序身世之悲哀也。舊注皆誤。

且夫天道迴旋。生民預焉。余烈祖於西晉。始流播於東川。洎余身而七葉。又遭時而北遷。提挈老幼。關河累年。死生契闊。不可問天。况復零落將盡。靈光巋然。日窮於紀。歲將復始。逼切危慮。端憂暮齒。踐長樂之神臯。望宣平之貴里。渭水貫於天門。驪山迴於地市。幕府大將軍之愛客。丞相平津侯之待士。見鐘鼎於金張。聞絃歌於許史。豈知灞陵夜獵。猶是故時將軍。咸陽布衣。非獨思歸王子。

以上自傷身世。此賦與太史公自序楊僕射書且不能相匹何論餘子

以上自傷身世。此賦與太史公自序同一神理。未可以形貌論也。徐孝穆與

倪曰言八世祖滔昔遭西晉永嘉之亂播遷江陵今已值梁承聖之年又自江陵北遷長安是天道之迴旋也。周書生民作民生預作賴。東川指漢滔居江陵言荊州爲江漢之域所云東川疑指東漢水而言不過舉其大要耳陸繁弼謂指江陵城東五里之東湖似失之狹倪以水經出荆山之漳水當之然漳水何以稱爲東川亦無據也。七葉已見上。潘安仁西征賦曰携老幼而入關倪曰滕王適漢集序云信携老入關烝烝色養子山謝趙王啓云其息荀娘傷心賦云一女成人一長孫孩穉是子山老幼並入長安也。詩擊鼓曰死生契闊毛傳曰契闊勤苦也。楚辭有天問。孔文學與曹公論盛孝章書曰海內知識零落殆盡。王文考魯靈殿賦序曰自西京未央建章之殿皆見墜壞而靈光巋然獨存。周書歸作巍。禮記月令曰季冬之月日窮于次月窮于紀星周于天數將幾終歲且更始。集切作迫。謝希逸月賦曰端憂多暇。三輔黃圖曰長樂宮本秦之興樂宮也高皇帝始居櫟陽七年長樂宮成徙居長安張平子西京賦曰實惟地之奧區神阜。三輔黃圖曰長安城東出北頭第一門曰宣平門民間所謂東都門洛陽伽藍記曰清陽門內有永和里里中太傅錄尙書長孫穉等六宅皆高門華屋當世名爲貴里。渭水見徐孝穆與李那書注。初學記地部上引辛氏三秦記曰

驪山始皇陵作地市生死人交易市平不得欺死人云秦五地市有斷馬利御覽引字句小異已見周趙國夫人墓誌銘注。幕府見思舊銘注。史記汲黯傳曰大將軍青既益尊黯與亢禮人或說黯曰自天子欲羣臣下大將軍大將軍尊重益貴君不可以不拜黯曰夫以大將軍有揖客反不重邪大將軍聞愈賢黯。漢書公孫弘傳曰弘菑川薛人也元朔中代薛澤爲丞相封爲平津侯於是起客館開東閣以延賢人與參謀議。周書庾信傳曰世祖高祖竝雅好文學信特蒙恩禮至於趙滕諸王周旋款至有若布衣之交羣公碑誌多相請託倪曰世宗明帝也魏恭帝三年曾授大將軍高祖武帝也孝閔踐祚時亦拜大將軍滕王迥天和末拜大將軍又滕王序云晉國公廟期受託爲世賢輔見信孝情毀至每日憫嗟按宇文護傳孝閔踐祚護拜大冢宰高祖立百官總己以聽於護自太祖爲丞相立左右十二軍總屬相府太祖崩後皆受護處分是護爲丞相矣信序二帝諸王寵遇之盛也。漢書張湯傳曰湯子安世尊爲公侯子延壽嗣侯又曰功臣之世唯有金氏張氏親近寵貴比於外戚金日磾傳曰封日磾爲綈侯子安上封爲都成侯。漢書外戚傳曰衛太子史良娣宣帝祖母也良娣有兄恭曾孫登至尊位是爲宣帝而恭已死恭三子皆以舊恩封長子高爲樂陵侯曾爲將陵侯立爲平臺侯及

高子丹以功德封武陽侯又曰宣帝許皇后元帝母也父廣漢封爲平恩侯復封廣漢兩弟舜爲博望侯延壽爲樂成侯蓋寬饒傳諫大夫鄭昌上書頌寬饒曰上無許史之屬下無金張之託左太冲詠史詩曰朝集金張館暮宿許史廬倪曰言已仕周得與貴戚交游非其好也。灑陵二句見吳明徹墓誌銘注。史記春申君傳曰楚使歇與太子完入質於秦秦留之數年楚頃襄王病太子不得歸於是黃歇說應侯曰太子若不歸則咸陽一布衣耳雷琳曰按梁國子孫客長安者若汝南王大封晉熙王大圓並簡文子圓肅武帝之孫武陵王紀之子其別枝則永豐侯撫豐城侯世怡皆與子山同時羈旅集中蕭世怡誌銘曰嗟南國之王子成東陵之故侯言思歸之人不獨梁嗣也此則子山鄉關之思爲全篇之宗旨也